

Sw Dij Goanz Zawxkauq Yeysuz

Yeysuz Yaix Dij Goanz Zawxkauq

Dix Taj Minghkoan Dij Sen

1 ¹Tih'azfaezloah laux saeq aj, mawz ruxndeq gux haeuz laiz bwnz sw ux hawj mawz yaq, laemh sowh gaenq Yeysuz hoak naeh zau naeh, zoq zawh laemh daeq zwz dix hiamq hoak hiamq zau naeh, ²mwz taengdeg vaenz dix zoah raep mwz ndaw fax naeh, zoq zawh vaenz dix aeu Minghkoan dij Sen saengq sowh dij goanz zawxkauq dix lowg naeh. ³Yeysuz jinkaem yaq, dix hoak lai yowngh taeuq hawj dij goanz zawxkauq dix ruxndeq dix haeuz daeuq zaeu. Siqsiq vaenz naeh dix hawj dij goanz zawxkauq dix taen, goj haxdoq paenqdix goh dij Sen baenzaqrawz.^a ⁴Zwz Yeysuz naengz daj paenqdix zaemh yuq naeh, dix hoakzaqnaeh saengq paenqdix: "Gaenqsu laekgah ni Yezluqsaxlaengx, taj Dez hoak diauq dix ndaej yinq naeh, diauq gux haeuz daj su hax yaq naeh. ⁵Zoq zawh hax Yezhanq aeu naemx hoak diauq zauh soiq naeh,^b gaj gvaq jij vaenz ux, dij Sen aeu Minghkoan dix saeh su hoak diauq zauh soiq naeh."

Yeysuz Mwz Ndaw Fax

⁶Gau paenqdix daj Yeysuz zaemh yuq naeh, paenqdix cham Yeysuz: "Zaeuj aj, mawz daz gannaeh hawj dij goanz Yixsowhleh raeuz daeuq

haeggaj gvanx Goh Yixsowhleh raeuz mbyah?"

⁷Yeysuz hax: "Zwzrawz, vaenz rawz, mizgaj Dez ndaw fax miz qenhliq dingq, mboq zawh gaenq hoj hawj su ruxndeq. ⁸Gaj Minghkoan dij Sen daeuj ndang su zwzrawz, gaenqsu zoq ndaej doakriangz. Yaq su zoq yuq ndaw Yezluqsaxlaengx, daengz mbanj Yaeuhdaq nauq, bae mbanj Saxmaxliqyaq, bae daengz dawj fax nauq, haxdoq daenh gaenqsu ndaejtaen gux hoak gaeng raeuh daj ruxnyinz gux hax gaeng raeuh." ⁹Hax gaemz kauq naeh nauq yaq, gau paenqdix naengz gaj lez Yeysuz naeh, Yeysuz zoah raep mwz ndaw fax, miz kvaix pajfax ux yaz dix, paenqdix zoq lez mboq taen dix. ¹⁰Gau dix kwnj mwz naeh, paenqdix lez dix daengz ta mboq yaep nauq, hubhaeb miz song goanz, nungh sowj kau rux rungh, in yuq haenz paenqdix. ¹¹Song goanz naeh daj paenqdix hax: "Dij goanz mbanj Zazliqliq aj, baenzaqrawz in lez fax mux? Yeysuz goanz ni su mwz, zoah raep mwz ndaw fax naeh, gaenqsu leztaen dix hoakzaqrawz mwz ndaw fax, mwznaj dix goj naengz hoakzaqrawz daeuq dauh daeuj."

Lowg Maxtihaq Hoak Dij

Goanz Zawxkauq Yeysuz

¹²Yaq paenqdix daeq Bo Maeghit dauh mwz Yezluqsaxlaengx, Bo Maeghit daj Yezluqsaxlaengx chaenh dungzliq mboq gvae lai, gvae teq Vaenz

^a1:3 *Goh dij Sen* zoq zawh hax: "Dij Sen haeggaj daeuj gvanx dij goanz dix."

^b1:5 Yezhanq aeu naemx saeh sowh puj ndaw zaw gaix naeh hoak diauq zauh soiq naeh, vanz dij Sen yangq gaenq hoakloang paenqdix, hoakzaqnaeh daj aeu naemx saeh paenqdix soiq ndang dungzlumj.

Cednoiq hawj daeq naeh. Laemh zwz naeh Vaenz Cednoiq mboq jinx daeq gvaq song liz.¹³ Paenqdix mwz taeng Yezluqsaxlaengx, ndonj mwz aen rownz ux, kwnj mwz hauh daih ngih dix, zoq zawh aen rownz dij goanz zawxkauq Yezsuz ndowj naeh. Hax tiq maz zoq zawh aen rownz Bihdowh, Yezhanq, Yaqgowh, Anzdowhle, Faezliq, Dozmax, Bazdozloahmaix, Maxtaiq, Yaqgowh goanz lug zaiz Yaqlowhfaez naeh, Cizmaenh goanz yuq ndaw dangxpaiq Faenqroi naeh,^c Yaeuhdaq goanz lug zaiz Yaqgowh naeh yuq ndaw dix ndowj naeh.¹⁴ Boangx goanz naeh daj jij yah mehrownz ux, Maxliqyaq meh Yezsuz daj le nongx zaiz Yezsuz, daengzle zaemh yuq, hoak zawdoag daj dij Sen hax kauq, hax haen laez haen lih.

¹⁵ Zwz naeh, miz vaenz ux, paenq bihnongx ndaw zauqhoiq naeh miz teq baeg-ux-laeng-ngihsip goanz ux naeh maz zaemh yuq. Bihdowh in maz, daj daengzle hax: ¹⁶ "Daengzle bihnongx gux aj, zwzpujjeq Minghkoan dij Sen haeuz hawj laux hongz Daqvaeq laemh zoah Yaeuhdaq goanz zowz dij goanz maz gaep Yezsuz naeh. Sowh kauq ndaw *Sw Dij Sen* laemh naeh gaemz rawz goj baenzaeh mboqyaq. ¹⁷ Goanz Yaeuhdaq naeh mbaednduq zawh daj raeuz zaemh boangx, zawh gaenqraeuz goanz ux, dix daj piu dungzlumj ndaej hoak dij goanz zawxkauq Yezsuz." ¹⁸ Dix aeu sowh jenz dix hoak mbowq ndaej naeh swx oax naz ux. Doaklaeng dix zoq doak bae ndaw naz dix, dongx tiag saej roh. ¹⁹ Gawz yuq Yezluqsaxlaengx ndowj gawz goj

ruxndeq mbaed saeh naeh, baenzaqnaeh dij goanz ndaw Yezluqsaxlaengx aeu kauq paenqdix rongx oax naz naeh hoak Yaqgowhdaqmax, zoq zawh hax: "Naz lowd."

²⁰ Unj yuq ndaw bwnz *Sw Lownx* naeh, laux hongz Daqvaeq hoakzaqnaeh laiz:

"Ngwz dih dix ndowj naeh byenqbaenz dih mowz, mboq miz gawz yuq';^d

Goj hoakzaqnaeh laiz:

"Ngwz daenh daeb sownq dix hoak naeh."^e

^{21–22} "Baenzaqnaeh gaenqraeuz baenz lowg goanz ux daeb Yaeuhdaq, hawj dix daj piu zaemh hoak dij goanz zawxkauq Yezsuz, zaemh haxdoq daenh dix goj ndaej taen Yezsuz tai yaq daeuq zaeu. Gaj goanz naeh baenzaqnaeh zuxbaenz, jeh Yezsuz daj piu zaemh yuq naeh dix goj kwnz daj piu zaemh yuq. Zoq zawh hax goanz naeh ndaej daeq vaenz Yezhanq saeh Yezsuz hoak diauq zauh soiq naeh maz taeng vaenz Yezsuz zoah raep mwz ndaw fax ni raeuz mwz naeh, kwnz daj piu zaemh yuq.

²³ Yaq daengzle lowg maz song goanz, goanz ux rongx hoak Yezsowh, daenh goj rongx dix hoak Bazsaxbaz daj Yaeuhswqduz, goanz ux rongx hoak Maxtihyaq. ²⁴ Daengzle zoq hoakzaqnaeh vanz dij Sen: "Zaeuj aj, mawz ruxndeq ndaw zaw dij goanz. Song goanz naeh, vanz mawz hawj piu ruxndeq

^c1:13 *Dangxpaiq Faenqroi* daj Baih Cizlih zawh dangqbaih. Dangxpaiq naeh mboq venq biak fahlil Loahmax.

^d1:20 Gaemz kauq naeh haeuz yuq *Sw Lownx* 69:25.

^e1:20 Gaemz kauq naeh haeuz yuq *Sw Lownx* 109:8.

goanz rawz zawh goanz mawz lowg, ²⁵hawj dix hoak dij goanz zawxkauq Yezsuz, hawj dix daeb Yaeuhdaq goanz haeuz viangh sownq dix hoak, mwz dih hoakri dix baenz mwz mboqyaq naeh." ²⁶Yaq daengzle maz ipqen, lez ip zoah gawz, doaklaeng ip zoah Maxtihyaq, dix daj sip'aet goanz dij goanz zawxkauq Yezsuz zaemh hoak dij goanz zawxkauq Yezsuz.

Jeng Kaeuj Mawq Minghkoan Dij

Sen Daeuj Nandang Cohsaenz Yezsuz

2 ¹Taeng Jeng Kaeuj Mawq,^f paenqdix maz zaemh yuq. ²Hubhaeb miz hiang ux daeq ndaw fax daeuj, sowh hiang naeh chung daj miz chaq laemz dwx ux baeuq dungzlumj, aen rownz paenqdix yuq naeh, daengz aen mizgaj sowh hiang naeh. ³Paenqdix leztaen sowh ux daj mbaw linx dungzlumj, daj faez dungzlumj. Sowh naeh banh bae now to paenqdix, now to gawz goj miz. ⁴Minghkoan dij Sen dumh daengz ndang paenqdix, sowh gaunaeh Minghkoan dij Sen hawj paenqdix rux hax kauq yowngh ndai.

⁵Zwz naeh, yuq Yezluqsaxlaengx chaenh miz puj Yaeuhtaiq sowh puj ruxndeq mbu dij Sen naeh ndowj. Paenqdix daeq dihravz raeuh maz.

⁶Hiang naeh daeh chung, dij goanz zoq og maz tomj lai taeuq, gawz goak sowh kauq rawz, gawz zoq ruxnyinz cohsaenz Yezsuz hax sowh kauq rawz, dangq goanz dangq ruxnyinz sowh kauq

dih hoakri goak naeh. Paenqdix ndaej mbaed tukzaw ux. ⁷Paenqdix sawzsowq se, hax: "Sawz gaiq eh, boangx hax kauq inxnaeh zawh dij goanz Zazliqliq naeujmax! ⁸Gaenqraeuz baenzzaqrawz dangq goanz dangq ruxnyinz paenqdix goak kauq dih raeuz mux?" ^{9–11}Sowh dij goanz yuq haenz biak cohsaenz Yezsuz hax kauq naeh zawh puj Yaeuhtaiq, mbangj goanz bwnz zawh puj Yaeuhtaiq, gaj mbangj goanz mbaednduq mboq zawh puj Yaeuhtaiq, zawh doaklaeng byenqbaenz puj Yaeuhtaiq.^g Paenqdix goanz ux daeq baih ux daeuj. Mbangj goanz daeq mbanj Paqtihyaq, mbanj Mixdixyaq, mbanj Yixlanh daj mbanj Maexsoahbuqdamixyaq maz. Naengz miz dij goanz daeq mbanj Yaeuhdaq, mbanj Zazpaqdozzaz, mbanj Baenxduz, mbanj Yaqciqyaq, mbanj Fuhloixzaz, mbanj Panghfaezliqyaq, mbanj Aizjih maz. Naengz miz dij goanz daeq haenzhenz Guxliqyaq chaenh ndaw mbanj Liqbixyaq naeh, daeq Loahmax chaenh maz leuh naeh, daeq Kowhlixtowh, daeq mbanj Azlazboah maz. Sowh dij goanz yuq haenz biak cohsaenz Yezsuz hax kauq naeh paenqdix hax: "Gaenqraeuz dangq goanz dangq ruxnyinz paenqdix goak kauq dih hoakri raeuz, paenqdix goanz ux lej aeu sowh kauq ux koanx sowh saeh dwx dij Sen hoak naeh."

¹²Daengzle sawz taeuq, goanz lej cham goanz: "Baenzzaqrawz baenzzaqnaeh mux?" ¹³Gaj mbangj

^f2:1 Puj Yaeuhtaiq gvaq Jeng Gvaq hajsip vaenz yaq, zoq taeng *Jeng Kaeuj Mawq*, paenqdix jin Jeng Kaeuj Mawq biangz dij Sen, biangz dij Sen hawj paenqdix miz gaenqjin.

^g2:9-11 Zwz naeh sowh dij goanz mboq zawh dij goanz Yaeuhtaiq naeh, jixzawh paenqdix gawz zawx byenqbaenz dij goanz Yaeuhtaiq, paenqdix zoq baenz hoak diauq zauh soiq naeh, mwz rownz dij Sen mbud dij Sen, heh naeng baeg dij noag, hoak daengz sam yowngh naeh zoq byenqbaenz dij goanz Yaeuhtaiq. Daeklaeng hoj biak fahlih Moahciz.

goanz kosaemj hax: "Zawh paenqdix ndut laeuj mawq lai gvaq laeujmiz naeujgoah!"

¹⁴ Bihdowh daj sip'aet goanz dij goanz zawxkauq Yezsuz naeh dwnq maz, dix caqsiq daj daengzle hax: "Sowh dij goanz yuq ndaw mbanj Yaeuhdaq ndowj naeh aj, daj sowh dij goanz yuq ndaw Yezluqsaxlaengx chaenh ndowj naeh aj, gaenqsu ruxndeq mbaed saeh naeh zuxbaenz, gaenqsu ndingq chu biak gux hax. ¹⁵ Gannaeh zux zawh zangnaw jeux denx, paenqdix mboq zawh daj gaenqsu hax naeh dungzlumj ndut laeujmiz. ¹⁶ Gaenq gaenqsu taen gannaeh daj gaemz kauq zwzpujjeq puj zawxkauq dij Sen Yezex hax naeh dungzlumj:

¹⁷ "Dij Sen hax: Jeh doaklaeng naeh,
Gux aeu minghkoan gux bae ndaw ndang sowh
dij goanz rawz gojmbaeuq,
mwznaj gux hawj lug zaiz su, lug nyingz su
zawx kauq gux,
Mwznaj gux hawj puj reauh daj paen'hwnz
dungzlumj taen sowh gaenq gux hawj
paenqdix ruxndeq naeh,
mwznaj gux hawj puj jeq paen'hwnz ruxnyinz
kauq gux.

¹⁸ Ndauj gaeng naeh, gux goj aeu Minghkoan gux
bae ndang puj koj zaiz gux daj ndang puj
koj nyingz gux,
hawj paenqdix zawx kauq gux.

¹⁹ Gux yuq ndaw fax hoak sowh saenh yaengh
saenh naeh, gux yuq dihndin hoak sowh
saeh mboq sanz taen naeh.
Miz lowd, miz faez, miz yailaeuh.

²⁰ Tang'vaenz rux byenq ndaem,
Aen hai rux byenq ndiang daj lowd dungzlumj,
daekgoanq vaenz Zaeuj su daeuj naeh, miz
suq saeh naeh mboqyaq. Vaenz gaengnaeh
daj vaenz ndai mboq dungzlumj, sowh
vaenz naeh dawj fax naengz mboq sanz
miz.

²¹ Taeng zwz naeh, nanghgaj gawz aeu Zaeuj
hoak dij Sen maengx, gawz zoq ndaej jeuq
mboqyaq.'"^h

²² Bihdowh daeuj hax: "Puj Yixsowhleh raeuz aj,
gaenqsu biak gaemz kauq naeh: Gaenqsu ruxndeq,
dij Sen hawj Yezsuz ndaw Nazsahlowh yuq haenz
su hoak saeh dwx, hoak sowh saenh yaengh saenh
naeh, hoak sowh saeh ndaw fax naeh, hawj su
ruxndeq Yezsuz zawh goanz dij Sen nemz daeuj
naeh. ²³ Yezsuz zoah aeu hawj su, zawh dij Sen
daeq zwz nduq maz haeuz bwnz ruxndeq, zawh
gaenqdix daz. Yezsuz zoah aeu hawj su yaq, su
hawj puj mbowq aeu dengdinz doag dix lamh mwz
maexngamzchaz tai. ²⁴ Gaj dih puj tai naeh jenj dix
mboq ndaej, baenzaqnaeh dij Sen zoq mboq hawj
diauq tai yuqraix naeh goq goq gvanx dix, hawj dix
daeuj zaeu. ²⁵ Laux hongz Daqvaeq hoakzaqnaeh
hax dix:

"Zaeuj gux yuq doqnaj gux daengznuq,
dix yuq baih qensa gux luz gux, hawj gux
mboq rux vae.

²⁶ Baenzaqnaeh, ndaw zaw gux faengz taeuq,

baeg gux hax kauq faengz, ndang gux miz dih maengx.

²⁷ Unj, mawz mboq rux jizzaz minghkoan gux yuq dihndaem.

Goj mboq rux hawj ndang dij goanz mawz goanz sawrik naeh naeuh.

²⁸ Mawz hawj gux ruxndeq ka loh ndaej aen mingh naeh;

hawj gux ndaej yuq doqnaj mawz faengz daengz gaemz hax mboq miz nauq.ⁱ

²⁹ "Bihmongx gux aj, puj jeq rownz raeuz Daqvaeq, gux haxdoq su swhlit, dix tai yaq, aeu haem yaq, taengdeg vaenzzawjraeuz moh dix goj naengz yuq inxnaeh. Gaenq naeh gux mboq yaem hax, gaenqsu gaj goanz gaj ruxndeq. ³⁰ Dix zawh puj zawxkauq dij Sen, goj ruxndeq dij Sen ndaej daj dix haxgoak daekgoanq, hax hawj luglan dix goanz ux daeb dix hoak hongz. ³¹ Dix haeuz ruxndeq Jizduz rux tai yaq daeuq zaeu,^j dix hoakzaqnaeh hax Jizduz rux tai yaq daeuq zaeu, dix hax:

"Minghkoan dix mboq rux zoah aeu viangh bae dihndaem, ndang dix goj mboq rux naeuh."

³² Bihdowh daeuq hax: "Goanz Yezsuz naeh, dij Sen haeuz hawj dix daeuq zaeu, gaenqpiu gaj goanz gaj ndaej taen. ³³ Dix zoah yaeuj mwz baih qensa dij Sen. Dez ndaw fax yinq aeu Minghkoan dix hawj Yezsuz, Yezsuz deq Minghkoan dij Sen yaq, dix aeu Minghkoan dij Sen sauq daeuj hawj piu. Minghkoan dij Sen sauq daeuj ndang piu yaq, baenzzaqnaeh gannaeh gaenqsu zoq leztaen daj ruxnyinz piu rux hax sowh kauq dih su naeh. ³⁴ Mboq zawh ndang Daqvaeq mwz ndaw fax, gaj dix hax:

"Dij Sen daj Zaeuj gux hax:

"Mawz naengh baih qensa gux,^k

³⁵ taj gux aeu sowh puj daj mawz hoak dangqbaih naeh hoak sowh daengq sowq dej din mawz naeh."^l

³⁶ Baenzzaqnaeh, daengzle dij goanz Yixsowhleh aj, gaenqsu ruxndeq zuxbaenz, Yezsuz, goanz su aeu dengdinz doag dix mwz maexngamzchaz, dij Sen hawj dix hoak Zaeuj, hoak Jizduz yah."

³⁷ Sowh puj biak Bihdowh hax kauq naeh, paenqdix ruxndeq Bihdowh hax zoah dih, ndaw zaw yuqraix. Miz dij goanz zoq daj Bihdowh daj dij goanz zawxkauq Yezsuz goanz ndai hax: "Bihmongx aj, gaenqpiu naengz hoakrawz baenz ndaej mbaeuq mux?" ³⁸ Bihdowh hax: "Gaenqsu gaj goanz gaj

ⁱ2:28 Le gaemz naeh haeuz yuq ndaw Sw Lownx 16:8-11.

^j2:31 *Jizduz* zawh hax: "Goanz zoah aeu yuz maeghit zoaj ndaw to naeh." Zwzndowj, dij Sen lowg puj Yixsowhleh goanz rawz hoak puj mbud dix, raj lowg goanz rawz hoak hongz puj Yixsowhleh, dix nemz puj Yixsowhleh aeu yuz maeghit zoaj ndaw to sowh goanz dix lowg naeh. Dij Sen tungzgoaq puj zawxkauq dix yinq dij goanz dix, yinq hawj paenqdix goanz Jizduz ux, hawj goanz Jizduz naeh daeuj dihndin jeuq dij goanz daj gvanx dij goanz.

^k2:34 *Naengh baih qensa gux* zawh hax: "hawj mawz najta dwx nyeuz daengzle."

^l2:35 Gaemz naeh haeuz yuq Sw Lownx 110:1.

yauq gaix, yaq aeu zwh Yezsuz Jizduz hoak diauq zauh soiq naeh,^m hoakzaqnaeh dij Sen zux yangq gaenq hoakloang su, dij Sen zux aeu minghkoan dix hawj su. ³⁹Unj gaenq dij Sen yinq aeu hawj naeh, zawh aeu hawj su daj lug su daj dij goanz dihndai, zoq zawh aeu hawj sowh dij goanz Zaeuj, dij Sen raeuz, rongx maz nowngz dix naeh." ⁴⁰Bihdowh naengz hax lai yowngh taeuq, saengq paenqdix, dix chownq daengzle, hax: "Gaenqsu baenz jeuq hoakri ni zoh mbowq tai mbowq naeuh naeh!" ⁴¹Yaq sowh puj biak dix chownq naeh, gaj goanz gaj hoak diauq zauh soiq naeh, vaenz gaengnaeh, cohsaenz Yezsuz za teq sam tiang goanz ux naeh. ⁴²Paenqdix caqsiq goq biak biak gaenq dij goanz zawxkauq Yezsuz zau naeh, daengzle hoak boangx ndeu, goanz lej saeh goanz, daengzle peg binx nyen Yezsuz,ⁿ daj dij Sen hax kauq.

Le Gaenq Cohsaenz Yezsuz Vaenz Vaenz Hoak Naeh

⁴³Ndauj gaengnaeh, daengzle mbu, dij Sen hawj dij goanz zawxkauq Yezsuz hoak sowh saeh mboq sanz taen naeh daj sowh saeh ndaw fax naeh. ⁴⁴Sowh puj siq naeh, daengzle maz zaemh yuq, gawz miz za'hoq gaeng goj zaemh yungq, ⁴⁵paenqdix goj miz puj kai raehnaz, za'hoq, aeu sowh ngaenzjenz naeh saeh paenqdix sowh puj mboq doh naeh. ⁴⁶Paenqdix vaenz vaenz hoak zawdoag maz rownz dij Sen zaemh yuq, bae hoak

rownz hoak rownz peg binx nyen Yezsuz, zaemh jin faengz taeuq, goanz lej hoak sw h dwk goanz, ⁴⁷zaemh biangz dij Sen, ndaej hawj daenh zaemz. Zaeuj gaj vaenz gaj hawj dij goanz ndaej jeuq, hawj dij goanz paenqdix gaj vaenz laeng gaj raengh.

Bihdowh Yuq Gumhhongh Rownz Dij Sen Koanx Kauqfaengz Dij Sen Dwk Daenh

3 ¹Miz vaenz ux, zang'vaenz sanz denx, zoq zawh sowh gau daj dij Sen hax kauq naeh, Bihdowh, Yezhanq mwz rownz dij Sen. ²Miz goanz ux, swn daeuj ka dix zoq bwnz ndiak, dix vaenz vaenz zoah daenh tam maz baegdu rownz dij Sen ux, baegdu naeh minxzwh rongx hoak: "Baegdu Yawz." Yuq dih naeh, goanz ka'ndiak naeh dex jenz sowh puj mwz rownz dij Sen naeh. ³Dix leztaen Bihdowh, Yezhanq mwz rownz dij Sen, zoq dex paenqdix. ⁴Bihdowh daj Yezhanq caqsiq lez bae doq dix, Bihdowh daj dix hax: "Lez maz doq piu!" ⁵Goanz gaengnaeh zoq caqsiq lez maz doq paenqdix, ngwz paenqdix aeu gaeng hawj dix. ⁶Gaj Bihdowh hax: "Jim, ngaenz gux gaeng goj mboq miz, gaj gux aeu sowh gaenq gux miz naeh hawj mawz: Gux aeu zwh Yezsuz Jizduz ndaw Nazsahlowh yaix mawz dwnq maz daeq!" ⁷Yaq Bihdowh zoq laeg qensa dix, fowz dix dwnq maz, ka dix daj nduk din dix cenq zaengx, miz doakriangz. ⁸Goanz gaengnaeh zoq yoanghyangh dwnq maz, in, daeq. Dix daj paenqdix zaemh mwz rownz dij Sen, menq daeq

^m**2:38** *Hoak diauq zauh soiq naeh* zawh hax gaenq ux baenzzaqnaeh, zoq zawh sowh puj hax venq siq Yezsuz naeh dix yuq doqnaj goanzlai yinq Yezsuz hoak Zaeuj, yaq miz goanz zoq aeu dix yup bae ndaw naemx, rux aeu naemx sauq yuq now to dix.

ⁿ**2:42** Paenqdix peg binx nyen Yezsuz zoq zawh hax paenqdix zaemh jin binx, zaemh ndut laeuj maegkaeu'it, nyen Yezsuz how dij goanz tai, daj Yezsuz saengq paenqdix hoakzaqnaeh hoak dungzlumj. Lez ndaw Sw Maxkowh Laiz Kauqfaengz Yezsuz 14:22-25, Sw Luhzaz Laiz Kauqfaengz Yezsuz 22:14-19.

menq yoangh, biangz dij Sen. ⁹ Goanzlai leztaen dix menq daeq menq biangz dij Sen, ¹⁰ goj ruxndeq dix zawh goanz zwzzwz yuq baegdu Rownz dij Sen baegdu yawz naeh dexkaeuj naeh, zoq cholaeng aen chaej dix yumq ndaej hoakzaqnaeh ya ndae zoq zaemz, sawz taeuq.

¹¹ Gau goanz mbaednduq ka'ndiak naeh yuq aen yauj Soaxloahmaenh naeh gaem qen Bihdowh daj Yezhanq naeh, goanzlai sawz taeuq, lenh maz dih paenqdix naeh. ¹² Bihdowh leztaen goanzlai sawz, zoq daj goanzlai hax: "Puj Yixsowhleleh aj. Su baenzzaqrawz cho mbaed saeh naeh sawz mux? Baenzzaqrawz lez piu daengz ta zow saw mux? Gaenqsu faeklah gaenqpiu hawj goanz naeh daeq baenz zawh cholaeng gaenqpiu miz doakriangz nyeuz daenh maj? Raj gaenqpiu sinq dij Sen haenlaez-haenlih nyeuz puj ndai maj? ¹³ Su aeu puj koj dij Sen Yezsuz hawj Bihlazdoz, ^ovanz Bihlazdoz kaj dix. Bihlazdoz hax zoangq dix, gaj su yuq doqnaj Bihlazdoz viangh dix nauq. Gaj dij Sen Yaqboahlazhanq, Yitsaeg, Yaqgowh naeh,^p zoq zawh dij Sen puj jeq rownz raeuz naeh hawj Yezsuz miz najtai. ¹⁴ Gaenqsu viangh Yezsuz, goanz sawrik, goanz gaemz hax mboq miz naeh, naengz gajfa daeuq vanz Bihlazdoz zoangq goanz luanq kaj dij goanz ndaej mwz kaeng naeh hawj su. ¹⁵ Gaenqsu kaj Zaeuj chauq aen mingh naeh, gaj dij Sen hawj dix tai yaq daeuq zaeu. Gaenqpiu ndaej ta taen mbaed saeh naeh singjringh. ¹⁶ Gaenqpiu sinq zwh Yezsuz rux hawj aen chaej dix ndae,

baenzzaqnaeh Yezsuz zoq hawj goanz naeh ndae, zoq zawh hawj goanz su ruxnaj naeh zaengx. Yezsuz hawj gaenqpiu sinq dix, baenzzaqnaeh goanz naeh yuq doqnaj su ndae nauq. ¹⁷ Paenqdix bihnongx aj, gux ruxndeq su hoakzaqnaeh hoak zawh gaenqsu mboq ruxndeq, daengz puj saeq su goj zawh venj naeh. ¹⁸ Gaj dij Sen hawj puj zawxkauq dix hax, hax Jizduz rux zoah daenh haiq tai, doaklaeng dij Sen zoq hawj baenzzaeh. ¹⁹ Baenzzaqnaeh, gaenqsu yauq gaix, dauh maz nowngz dij Sen, hawj dix yangq gaenq hoakloang su. ²⁰ Hoakzaqnaeh, dij Sen zux daeuq hawj gaenqsu yuqzaih, Zaeuj goj nemz Jizduz Yezsuz goanz dix haeuz lowg hawj su naeh daeuj. ²¹ Jizduz baenz yuq ndaw fax, taengdiak zwz dij Sen hawj gaj yowngh gaj daeuq mawq baenzzaq mbaednduq naeh. Daeq chauq fax chauq dihndin maz dij Sen haeuz hawj paenq dij goanz dix paenq puj zawxkauq dix hax yaq. ²² Baenzzaq gaenq Moahciz ndaejdaj puj Yixsowhleleh raeuz hax naeh: 'Zaeuj, dij Sen su, yaeuj bihnongx su goanz ux hoak puj zawxkauq dix, daj gux dungzlumj. Goanz naeh dix daj su hax gaeng gojndae, su hoakrawz goj biak dix. ²³ Gawz mboq biak goanz puj zawxkauq dij Sen naeh, zoq byaeg dix, mboq hawj dix hoak dij goanz dij Sen.' ²⁴ Daengzle puj zawxkauq dij Sen, daeq zwz Saxmuxex naeh maz, nanghgaj gawz hax sowh saeh mwznaj naeh, gawz goj hax zoah ndauj zawjraeuz. ²⁵ Gaenqsu zawh luglan puj zawxkauq dij Sen, dij Sen daj puj jeq rownz su dungzdingq. Dix daj Yaqboahlazhanq hax: 'Dij goanz dihndin, changz

^o3:13 Bihlazdoz zawh puj saeq gvanx puj kaenglauz, dix gvanx mbanj Yaeuhdaq.

^p3:13 *Yaqboahlazhanq, Yitsaeg, Yaqgowh*, sam goanz naeh zawh zuxzungz puj Yixsowhleleh. Lez ndaw Sw Zwz nduq 12.

rawz goj ndaelaeng luglan mawz.⁹ ²⁶ Dij Sen yaeuj puj koj dix,^r nemz dix daeuj dih su daekgoanq, hawj su ni gaenqndog, dauh maz doq dij Sen."

4¹ Gau Bihdowh, Yezhanq doiqdx daj goanzlai hax kauq naeh, puj mbud dij Sen, yaq goanz puj saeq dawz rownz dij Sen naeh, yaq dij goanz Saxduzgaiz,^s paenqdx daeq maz zawj, ² ruxnyinz dij goanz zawxkauq Yezsuz zau goanzlai, haxdoq daenh Yezsuz tai yaq daeuq zaeu. Baenzaqnaeh paenqdx zoq jih taeuq. ³ Paenqdx zoq goanz Bihdowh daj Yezhanq. Gaj gaunaeh fax haeuz ndaem, paenqdx zoq aeu Bihdowh daj Yezhanq kaeng taeng vaenzlaeng. ⁴ Sowh puj biak dij goanz zawxkauq Yezsuz koanx naeh, miz dij goanz lai taeuq sinq. Taeng vaenz gaengnaeh, sowh puj sinq Zaeuj naeh, puj zaiz daengzle miz teq haj tiang goanz ux naeh.

⁵ Vaenzlaeng, sowh puj saeq gvanx puj Yaeuhtaiq naeh, yaq sowh laux jeq miz najta naeh, yaq sowh lauxswz zau *Sw Dij Sen* naeh, paenqdx maz Yezluqsaxlaengx zaemh yuq, ⁶ naengz miz Yaqnah, goanz gvanx puj mbud dij Sen goanz saeq dwx nyeuz daengzle naeh, yaq Gaizyaqfah, Yezhanq, Yaqlihsanzdaq, sam goanz naeh zawh bihnongx Yaqnah. Yaqnah naengz miz bihnongx ndai tem goj maz, daengzle yuq dih gaengnaeh. ⁷ Paenqdx yaix dij goanz zawxkauq Yezsuz in jinghzang daengzle, jinj paenqdx: "Gaenqsu hawj goanz gaengnaeh

ndae, zawh aeu sowh doakriangz rawz, zawh aeu zwh gawz hoak?" ⁸ Zwz naeh, Minghkoan dij Sen dumh daengz ndang Bihdowh, dix zoq daj paenqdx hax: "Puj saeq puj Yaeuhtaiq daj puj jeq aj! ⁹ Piu saeh goanz ka'ndiak gaengnaeh hoak saeh ndae, baenzaqnaeh gannaeh su jinj piu hoakzagrax hawj goanz ka'ndiak gaengnaeh ndae. ¹⁰ Gaenqsu daj daengzle dij goanz Yixsowhleh gaj goanz gaj ruxndeq zuxbaenz, goanz in doqnaj su naeh ndae yah, zawh ndaelaeng zwh Yezsuz Jizduz ndaw Nazsahlowh. Goanz Yezsuz Jizduz naeh, su aeu dengdinz doag dix mwz maexngamzchaz. Gaj dij Sen hawj dix tai yaq daeuq zaeu. ¹¹ Goanz Yezsuz naeh zoq daj kvaix tin ndaw *Sw Dij Sen* hax naeh dungzlumj. Ndaw *Sw Dij Sen* hax:

"Kvaix tin puj hoak zangh su aeu viangh naeh, haeuz baenz tin'dinsaeu kvaix zungqyauq nyeuz daengzle naeh.*"

¹² Daengz dawj fax nauq, mizgaj zwh Yezsuz, gvaqmaz dij Sen mboq aeu zwh gawz hawj raeuz maengx dix ndaej jeuq. Baenzaqnaeh, mizgaj dix rux jeuq, gvaqmaz mboq miz gawz."

¹³ Paenqdx leztaen Bihdowh daj Yezhanq ngoah taeuq, goj ruxndeq doiqnaeh mboq ndaej doag sw lai, zoq sawz taeuq, goj nwh ndaej doiqnaeh ndaej nowngz Yezsuz. ¹⁴ Paenqdx goj leztaen goanz

⁹3:25 Gaemz kauq naeh haeuz yuq Sw Zwz nduq 12:3.

^r3:26 Gaemz kauq naeh goj ingj hoanx naeh hax: "Dij Sen hawj puj koj dix daeuq zaeu."

^s4:1 Baih *Saxduzgaiz* zawh baih puj Yaeuhtaiq ux. *Sw Dij Sen*, paenqdx sinq gaj haj bwnz sw Moahciz laiz naeh. Paenqdx mboq sinq miz bin dij Sen, miz minghkoan, dij goanz tai yaq rux daeuq zaeu.

* 4:11 Lownx 118:22.

zoah ya ndae yaq naeh daj doiqdix zaemh in, zoq mboq miz gaemz yaeng. ¹⁵ Yaq paenqdix zoq yaix doiqnaeh bae baihnog ndaw hoiq puj Yaeuhtaiq. Daeuq hoakzaqnaeh dungzcham: ¹⁶ "Mbaed saeh paenqdix hoak naeh, zawh sowh saenh yaengh saenh naeh singjringh, nanghgaj zawh sowh dij goanz yuq ndaw Yezluqsaxlaengx ndowj naeh, daengzle ruxndeq nauq, gaenqraeuz hax mboq miz goj hax mboq baenz. Baenzaqnaeh, gaenqraeuz hoj aeu paenqdix hoakzawz hoak mux?" ¹⁷ Cho laek hawj mbaed saeh naeh gaj laeng gaj leuz bae gvae, gaenqraeuz cog paenqdix zuxbaenz, laek hawj paenqdix aeu zwh Yezsuz koanx dwk daenh." ¹⁸ Yaq paenqdix zoq rongx Bihdowh daj Yezhanq maz, yaix doiqdix mboq jinx laemh zwh Yezsuz, mboq jinx aeu gaenqnaeh zau daenh. ¹⁹ Bihdowh daj Yezhanq yaeng: "Yuq doqnaj dij Sen, biak kauq su hoj nyeuz rux biak kauq dij Sen hoj nyeuz, gaenqsu haeggaj daeg neh!" ²⁰ Gaenq gaenqpiu taen naeh daj gaenq gaenqpiu ruxnyinz naeh, piu mboq hax mboq baenz!"

^{21–22} Goanz hawj sowh saenh yaengh saenh ya ndae naeh ndaej siqsip lai bi, dix haeuz ka'ndiak ndaej siqsip lai bi, gannaeh ndaej ya ndae. Daengzle zoq biangz dij Sen. Hoakzaqnaeh, puj saeq dih aeu Bihdowh daj Yezhanq hoakrawz mboq miz, paenqdix daeuq cog Pihnowh daj Yezhanq mbaedmawq, zoq zoangq doiqdix.

Cohsaenz Yezsuz Vanz Zaeuj

Hawj Paenqdix Miz To'zaw

²³ Bihdowh daj Yezhanq zoangq daeuj yaq, zoq dauh mwz dih dij goanz hoakri naeh. Doiqdix haxdoq dij goanz hoakri sowh goanz gvanx puj mbud dij Sen naeh daj sowh puj saeq gvanx puj Yaeuhtaiq naeh hoakzawz cog doiqdix, doiqdix gaeng goj laemh dwk paenqdix nauq. ²⁴ Paenqdix biak yaq, daengzle zawdoag, caqsiq daj dij Sen hoakzaqnaeh hax: "Zaeuj aj! Mawz zawh dij Sen chauq fax, dihindin, haij daj daengzle nauq naeh!" ²⁵ Mawz ndaej hawj Minghkoan mawz yaix puj koj mawz, puj jeq rownz piu laux hongz Daqvaeq, hoakzaqnaeh hax:

"Gohzaz ndai baenzaqrawz luanq mbukmbuk mux?

Dij goanz dawj fax baenzaqrawz daz sowh saeh baenz mboq ndaej naeh mux?

²⁶ Puj hoak hongz paenqdix maz zaemh yuq,

Puj saeq paenqdix maz dihndeuh dwkgangz, dix YEZ'HOAHHUAH daj goanz dix aeu hoak Jizduz naeh."^{tu}

²⁷ Laux hongz Cizlih daj Baenxdeuz-bihlazdoz, puj Yixsowhle daj puj yowngh ndai yuq chaenh naeh zaemh yuq zaeh, dix puj koj mawz Yezsuz, goanz mawz aeu yuz lup hawj dix hoak hongz naeh.

²⁸ Paenqdix yuq ndaw mungz mawz hoak sowh saeh

^t4:26 *Jizduz* goj rongx hoak *Mihσαιqyaq*. *Jizduz* daj *Mihσαιqyaq*, song aen minxzh naeh zoq zawh hax: "Goanz ndaej aeu yuz lup naeh." Zwz naeh aeu yuz lup zoq zawh hax hawj dix hoak hongz.

^u4:26 Suq kauq naeh haeuz yuq Sw Lownx 2:1-2.

mawz haeuz bwnz daz naeh. ²⁹Zaeuj aj, paenqdix cog piu, gannaeh vanz Zaeuj lez singjringh, vanz mawz hawj puj koj mawz miz to'zaw, mboq mbu gaeng bae koanx kauq mawz. ³⁰Vanz mawz ed mungz mawz aeu zwh Yezsuz goanz puj koj mawz goanz sawrik naeh ya aen chaej, hoak sowh saeh ndaw fax naeh daj sowh saeh mboq sanz taen naeh." ³¹Paenqdix daj dij Sen hax kauq gah, dih paenqdix zaemh yuq naeh fenz, honz, Minghkoan dij Sen dumh daengz ndang paenqdix. Paenqdix zoq miz to'zaw, mboq mbu gaeng bae koanx kauq dij Sen.

Gaeng Goj Aeu Hawj Daengzle Zaemh Yungq

³²Sowh puj sinq Yezsuz naeh daengzle zawdoag, zaemh gaemz, mboq miz gawz hax za'hoq dix zawh gaeng hoakri, yowngh rawz goj zaemh yungq. ³³Dij goanz zawxkauq Yezsuz miz doakriangz taeuq, paenqdix haxdoq daenh paenqdix ndaej taen Yezsuz, Zaeuj tai yaq daeuq zaeu. Dij Sen gumx daengzle sowh puj sinq Yezsuz naeh. ³⁴⁻³⁵Paenqdix gawz miz raehnaz daj rownz, gawz zoq kai, aeu sowh ngaenz paenqdix kai ndaej naeh maz, aeu nyaengx doqnaj dij goanz zawxkauq Yezsuz, gawz mboq doh zoq aeu hawj gawz, baenzaqnaeh, paenqdix mboq miz gawz cha gaeng. ³⁶Miz goanz puj Liqvaeq ux, yuq ndaw haixdaux Saiqpuxluqsez zowngx, minxzwh rongx hoak Yezsowh. Dij goanz zawxkauq Yezsuz rongx dix hoak Baznahbaz. "Baznahbaz" zawh hax: "Puj byongz." ³⁷Dix miz raehnaz, goj kai, aeu ngaenz maz, nyaengx bae doqnaj dij goanz zawxkauq Yezsuz.

Yaqnahnihyaq Daj Saxfaezlaz

5 ¹Miz goanz ux minxzwh rongx hoak Yaqnahnihyaq, dix daj mijmez dix Saxfaezlaz kai raehnaz, ²dix lupliamx aeu ngaenz leux mbangj, mijmez dix goj ruxndeq, dix aeu gaeng low naeh maz nyaengx bae doqnaj dij goanz zawxkauq Yezsuz. ³Bihdowh hax: "Yaqnahnihyaq! Mawz baenzaqrawz hawj Sazdanz gvanx zaw mawz mux? Baenzaqrawz haxyai Minghkoan dij Sen, lupliamx aeu sowh ngaenz kai raehnaz ndaej naeh leux mbangj mux? ⁴Zwz raehnaz mawz naengz mboq kai naeh, mboq zawh gaeng hoakri mawz lox? Kai yaq, sowh ngaenz kai ndaej naeh, mboq zawh mawz ngaiq aeu hoakrawz zoq aeu hoakrawz lox? Gaj mawz baenzaqrawz miz sowh sai'zaw naeh mux? Mawz mboq zawh haxyai dij goanz ah, zawh haxyai dij Sen mbyah!" ⁵Yaqnahnihyaq daeh ruxnyinz gaemz kauq naeh, zoq hub laemx, kaedzaw. Sowh puj ruxnyinz naeh, gawz goj mbu taeuq. ⁶Miz jij goanz puj reauh ux, toq dix, tam dix bae moak. ⁷Gvaq ndaej teq sam aen zungztaeuh ux naeh, mijmez Yaqnahnihyaq ndonj maz, naengz mboq ruxndeq miz gaeng saeh. ⁸Bihdowh cham dix: "Mawz ciq haxdoq gux mbaed ux, sowh ngaenz su kai raehnaz ndaej naeh zawh suq naeh vah? "Dix yaeng: "Aenh, ndaej gaenh nez." ⁹Bihdowh hax: "Gaenqsu baenzaqrawz hoak zawdoag daeg Minghkoan Zaeuj mux? Sowh puj aeu po mawz bae moak naeh haeuz maz taeng baegdu yah, paenqdix goj tam mawz bae." ¹⁰Saxfaezlaz cenq laemx bae doqnaj din Bihdowh, kaedzaw. Le goanz puj reauh naeh ndonj maz, leztaen dix haeuz tai, zoq tam og

bae, aeu dix bae moak haenz po dix. ¹¹ Daengzle dij goanz zauqhoiq daj sowh dij goanz ruxnyinz mbaed saeh naeh, gaj goanz gaj mbu taeuq.

Zaeuj Hawj Dij Goanz Zawxkauq Yezsuz Rux Hoak Sowh Saenh Yaengh Saenh Naeh Lai Taeuq

¹² Zaeuj aeu mungz dij goanz zawxkauq Yezsuz yuq haenz daengzle hoak sowh saeh ndaw fax naeh daj sowh saeh mboq sanz taen naeh lai taeuq. Cohsaenz Yezsuz daengzle hoak zawdoag maz aen yauj Soaxloahmaenh naeh zaemh yuq. ¹³ Puj ndai mboq ganz maz haenz paenqdix, gaj lezndaejqix paenqdix taeuq. ¹⁴ Puj sinq Zaeuj gaj laeng gaj raengh, puj nyingz puj zaiz goj miz lai. ¹⁵ Naengz miz dij goanz tam puj chaej bae hangzhw, aeu nyaengx now tanj, now faz, ngwz Bihdowh gvaq zoah gaurawz ngauez dix yaz bae zoah ndang paenqdix. ¹⁶ Miz dij goanz lai taeuq zowz puj chaej daj sowh puj zoah dij pi mwz ndang naeh, daeq le longq haenzhenz Yezluqsaxlaengx naeh maz, daengzle ndaej ya ndae nauq.

Dij Goanz Zawxkauq Yezsuz Zoah Daenh Haiq

¹⁷ Goanz gvanx puj mbud dij Sen saeq dwx nyeuz daengzle naeh daj sowh puj daj dix hoak baih ndeu naeh, zoq zawh dij goanz paiq Saxduzgaiz, paenqdix leztaen gaengq naeh, ta'ndaem paenqdix daengz mboq zawh haxnyaeux. ¹⁸ Yaq paenqdix zoq goangz dij goanz zawxkauq Yezsuz, aeu kaeng mwz ndaw lauz. ¹⁹ Hwnz gaengnaeh, miz goanz bin dij Sen ux, aj baegdu ndaw lauz, lingz paenqdix

og daeuj. ²⁰ Dix daj paenqdix hax: "Gaenqsu mwz gumhhongh rownz dij Sen, aeu sowh kauqfaengz Yezsuz hawj dij goanz ndaej aen mingh mawq naeh koanx dwk goanzlai." ²¹ Dij goanz zawxkauq Yezsuz biak gaemz kauq naeh, sowh gau fax zaekgaj rungh naeh zoq mwz gumhhongh rownz dij Sen zau daenh. Goanz gvanx puj mbud dij Sen saeq dwx nyeuz daengzle naeh daj sowh puj daj dix hoak baih ndeu naeh rongx daengzle dij goanz ndaw hoiq puj Yaeuhtaiq^v daj sowh puj saeq gvanx puj Yixsowhlehoakri naeh maz dungzlaemh, yaq nemz dij goanz bae ndaw lauz gaemh dij goanz zawxkauq Yezsuz maz. ²² Gau puj dawzdu bae taeng ndaw lauz naeh, leztaen dij goanz zawxkauq Yezsuz mboq yuq ndaw lauz, zoq dauh maz haxdoq, ²³ hax: "Gaenqpiu leztaen baegdu ndaw lauz ngaemz ndae'ndowq, sowh puj dawz naeh goj in yuq baihnog baegdu, gaj aj baegdu lez, ndaw dix mboq taen goanz rawz." ²⁴ Goanz puj saeq dawz rownz dij Sen naeh daj sowh goanz gvanx puj mbud dij Sen naeh, ruxnyinz suq kauq naeh yaq, sawz taeuq, mboq ruxndeq zawh gaeng saeh. ²⁵ Sowh gau naeh, miz goanz maz hoakzaqnaeh haxdoq: "Sowh dij goanz su aeu kaeng ndaw lauz naeh, gannaeh yuq gumhhongh rownz dij Sen zau daenh." ²⁶ Yaq goanz puj saeq dawz rownz dij Sen naeh daj puj dawzdu bae zowz dij goanz zawxkauq Yezsuz maz, gajlej mboq ganz ndaed paenqdix, unj paenqdix mbu goanzlai aeu tin saeuh paenqdix. ²⁷ Paenqdix zowz maz taeng yaq, zoq yaix dij goanz zawxkauq Yezsuz in doqnaj ndaw hoiq puj Yaeuhtaiq. Goanz gvanx puj mbud dij Sen saeq dwx

^v5:21 *Dij goanz ndaw hoiq puj Yaeuhtaiq* daengle miz jiatsip laux. Paenqdix zoanzmaenh gvanx puj Yaeuhtaiq hoakzaqrawz kvej dij Sen.

nyeuz daengzle naeh hax paenqdix: ²⁸"Gux haeuz saengq su zaeh zaeh, mboq jinx aeu sowh saeh naeh koanx dwk daenh. Gaj gaenqsu gajfa aeu dauqlix su koanx daengz chaenh Yezluqsaxlaengx nauq, goanz gaengnaeh haeuz zoah kaj yaq, su naengz goq finh finh, daz hawj piu tw'taeb." ²⁹Bihdowh daj daengzle dij goanz zawxkauq Yezsuz yaeng: "Biak dij Sen hoj nyeuz biak dij goanz, gaenqpiu biak dij Sen zuxbaenz. ³⁰Yezsuz, goanz su aeu dix lamh mwz ndaw maex tai naeh, dij Sen puj jeq rownz raeuz haeuz hawj dix daeuq zaeu yaq. ³¹Dij Sen yaeuj dix, hawj dix hoak hongz, hoak Zaeuj jeuq dij goanz, hawj dix yuq baih qensa hoakri, hoakzaqnaeh hawj zaw dij goanz Yixsowhleh hoak loang rux gaix, hawj gaenq hoakloang paenqdix ndaej yangq. ³²Gaenqpiu ndaej ta'taen sowh saeh naeh, haxdoq su. Dij Sen aeu Minghkoan dix hawj sowh dij goanz biak kauq dix naeh, Minghkoan dij Sen goj haxdoq daenh sowh saeh naeh zawh zaeh."

³³Dij goanz ndaw hoiq Yaeuhtaiq ruxnyinz yaq, jih daengz mboq zawh haxnyaeux, daz kaj dij goanz zawxkauq Yezsuz. ³⁴Gaj miz goanz Fahliqsaiq ux, minxzw h rongx hoak Zazmaxleh, dix zawh sowh lauxswz aeu *Sw Dij Sen* zau daenh naeh, dix yuq ndaw hoiq puj Yaeuhtaiq zawh goanz ux, dix dwnq maz, nemz dij goanz zowz dij goanz zawxkauq Yezsuz bae baihnog goanq, ³⁵yaq dix daj daengzle hax: "Dij goanz Yixsowhleh aj, hoaksaeh le goanz naeh, gaenqraeuz baenz caqsiq ixux. ³⁶Koax daekgoanq, goanz Duqdah gaengnaeh hax hoakri haen zawzmbokraeuh, miz dij goanz nowngz dix teq siq baeg goanz ux naeh, dix zoah daenh kaj yaq, sowh puj nowngz dix naeh daengzle byaeg

mwz rawz mwz nauq, mboq low goanz rawz. ³⁷Doaklaeng, sowh zwz anq dij goanz naeh, goanz Yaeuhdaq ndaw mbanj Zazliqliq naeh coak daenh nowngz dix, dix goj zoah daenh kaj, dix tai yaq, sowh puj nowngz dix naeh goj goanz ux le byaeg mwz dih ux nauq. ³⁸Gannaeh, gux chownq su, laek gvanx paenqdix, jizzaz paenqdix ndeh, gaenq paenqdix daz naeh daj gaenq paenqdix hoak naeh, jixzawh zawh dij goanz haeggaj hoak, toj hoak mwznaj mboq ndaej goah. ³⁹Jixzawh zawh dij Sen yaix hoak, su toj ndaep paenqdix mboq ndaej, yaj gaenqsu fanj zoah dij Sen tem." ⁴⁰Dij goanz ndaw hoiq biak gaemz dix, yaq rongx dij goanz zawxkauq Yezsuz maz, dup paenqdix mwngx ux, daeuq saengq paenqdix, mboq jinx aeu sowh saeh Yezsuz naeh zau daenh, yaq zoangq paenqdix. ⁴¹Dij goanz zawxkauq Yezsuz ni ndaw hoiq puj Yaeuhtaiq, paenqdix nwh taeng Zaeuj hawj paenqdix cho zw h Zaeuj zoah daenh qiz, ndaw zaw paenqdix zoq faengz taeuq. ⁴²Paenqdix vaenz vaenz yuq gumhhongh rownz dij Sen daj bae hoak rownz rownz zau daenh, koanx kauqfaengz dwk daenh, haxdoq daenh Yezsuz zawh Jizduz.

Lowg Jiat Goanz Gaem Gaenqjin

6¹Zwz naeh, cohsaenz Yezsuz gaj laeng gaj miz lai. Puj Yaeuhtaiq sowh puj goak kauq Cizlah naeh hax puj Yaeuhtaiq sowh puj goak kauq Cizboahlaiz naeh. Paenqdix hax sowh yah po haeuz tai yaq goak kauq Cizboahlaiz naeh vaenz vaenz baen ndaej kaeujpyaek, gaj sowh po haeuz tai yaq goak kauq Cizlah paenqdix naeh kwnzkwnz baen mboq ndaej kaeujpyaek. ²Sipngih goanz dij goanz

zawxkauq Yezsuz zoq rongx daengzle cohsaenz Yezsuz maz, daj paenqdix hax: "Jixzawh gaenqpiu mboq aeu kauq dij Sen koanx dwk daenh, bae gaem gaj gaenqjin, zawh mboq hoj. ³Baenzaqnaeh, paenq bihnongx aj, gaenqraeuz hoj lowg boangx su jiat goanz zaiz maz gaem jenz gaem gaenqjin. Jiat goanz naeh, puj ndai gawz goj doiq dix mboq miz gaemz gaeng, ndang miz Minghkoan dij Sen, miz aen gvai, zoq hawj jiat goanz naeh gaem gaenqjin. ⁴Gaj gaenqpiu mbeh'ej, caqsiq daj dij Sen hax kauq, zau daenh." ⁵Daengzle venq, yaq lowg Sowztihfanx, Sowztihfanx mizzaw sinq dij Sen taeuq, miz Minghkoan dij Sen dumh daengz ndang dix, daeuq lowg Faezliq, Boahloahgozloah, Nihzaznoaq, Tihmaenh, Bazmixnah, Nihgozlaz goanz dij goanz ndaw Anztih'az naeh. Goanz Nihgozlaz naeh mbaednduq mboq zawh puj Yaeuhtaiq, gaj dix haeuz byenqbaenz puj Yaeuhtaiq yaq. ⁶Yaq paenqdix hawj sowh dij goanz paenqdix lowg naeh in doqnaj dij goanz zawxkauq Yezsuz. Dij goanz zawxkauq Yezsuz daj dij Sen hax kauq yaq, aeu mungz baed bae now paenqdix.

⁷Gaj laeng gaj miz goanz lai ruxnyinz kauq dij Sen, yuq ndaw Yezluqsaxlaengx, dij Sen hawj cohsaenz Yezsuz za lai taeuq. Puj mbud dij Sen goj miz lai taeuq sinq Yezsuz, biak kauq dix.

Sowztihfanx Zoah Daenh Goangz

⁸Dij Sen yumq doiq Sowztihfanx ndae taeuq, aeu doakriangz hawj dix, dix yuq doqnaj daengzle hoak saeh dwx sowh saeh mboq sanz taen naeh daj sowh saeh ndaw fax naeh. ⁹Zwz naeh, aen

rownzndawcowq Liqbowhdiqnah^w naeh miz jij goanz ux daj dij goanz ndaw Guxliqnaiq, Yaqlihsanzdaq, Jizliqzaz daj Yaqciqyaq daeuj dih Sowztihfanx naeh, paenqdix daj dix dungzjin. ¹⁰Gaj Sowztihfanx miz minghkoan dij Sen, aeu aen gvai hax kauq, paenqdix hax bex dix mboq ndaej. ¹¹Yaq paenqdix zoq aeu ngaenzjenz oat daenh, hawj daenh moakndai Sowztihfanx, miz dij goanz hax: "Gaenqpiu ruxnyinz dix hax mbowq Moahciz daj dij Sen!" ¹²Paenqdix daeuq coak goanzlai, coak puj saeq puj Yaeuhtaiq, coak sowh lauxswz zau *Sw Dij Sen* naeh. Sowh puj paenqdix coak naeh zoq maz goangz Sowztihfanx, gaemh dix mwz ndaw hoiq puj Yaeuhtaiq. ¹³Paenqdix yaix daenh hax kauqzaj, moakndai Sowztihfanx, hoakzaqnaeh hax: "Sowztihfanx kwnzkwnz haxmbowq rownz dij Sen daj fahlh Moahciz. ¹⁴Baenzaq gaenq naeh, gaenqpiu ndaej ruxnyinz dix hoakzaqnaeh hax: 'Yezsuz ndaw Nazzahlowh daz vaih rownz dij Sen, daz gaix sowh Moahciz zauh daeuj hawj raeuz naeh.'" ¹⁵Sowh dij goanz yuq ndaw hoiq naeh, daengzle lez dix daengz ta mboq yaep nauq, leztaen naj dix daj naj bin dij Sen dungzlumj.

7 ¹Goanz gvanx puj mbud dij Sen saeq dwx nyeuz daengzle naeh cham: "Sowh saeh naeh zawh zaeh vah?" ²Sowztihfanx hax: "Le goz aj, le cuh aj, daengzle aj, gaenqsu biak gux hax. Puj jeq rownz raeuz Yaqboahlazhanq, zwz dix yuq ndaw Maexsoahbuqdahmixyaq, naengz mboq mwz Hazlanh ndowj naeh, dij Sen dwx nyeuz daengzle naeh daeuj ³daj dix hax:

^w6:9 Liqbowhdiqnah zawh hax sowh dij goanz naeh mbaednduq zawh puj koj, doaklaeng ndaej zoangq daeuj.

"Mawz ni goakrownz mawz,
ni changzrownz mawz,
mwz dih gux haeggaj lingz mawz mwz naeh."^x

⁴"Yaqboahlazhanq zoq ni dih dij goanz Zazlowhdix naeh^y, mwz ndaw Hazlanh ndowj. Dez dix tai yaq, dij Sen daeuq lingz dix maz taeng dih su gannaeh ndowj naeh. ⁵Yuq dih naeh dij Sen mboq aeu raehnaz hawj dix, daengz dih ndowj naengz mboq miz. Gaj dij Sen yinq dix, yinq aeu dih naeh hawj dix daj luglan dix hoak dih yuq dih hoakjin. Hax lej hoakzaqnaeh hax, gaj zwz naeh Yaqboahlazhanq naengz mboq miz lug zaiz. ⁶Dij Sen daj dix hoakzaqnaeh hax:

"Mwznaj luglan mawz bae dih daenh dex
ndowj mboqyaq, dij goanz dih naeh hawj
paenqdix hoak puj koj, vazkuz paenqdix
siq baeg bi."^z

⁷"Dij Sen daeuq hax:

"Gaj gux toj haeggaj fah goh hawj paenqdix
hoak puj koj naeh,
Luglan mawz og daeuj yaq, yuq dih inxnaeh
kvej gux."^a

⁸Dij Sen daj Yaqboahlazhanq dungzdingq, dij Sen yaix puj zaiz paenqdix hoak diauq zauh heh naeh. Hoak diauq zauh heh naeh zoq zawh hax paenqdix

daj dij Sen dungzdingq gaenq naeh. * Baenzaqnaeh, Yaqboahlazhanq miz Yitsaeg yaq, vaenz daih biad zoq saeh dix hoak diauq zauh heh naeh. Yitsaeg miz Yaqgowh, Yaqgowh miz sipngih goanz puj jeq rownz raeuz. ⁹Puj jeq rownz raeuz ta'ndaem nongx zaiz paenqdix Yezsowh, aeu dix kai bae Aizjih. Gaj dij Sen daj dix zaemh yuq, ¹⁰dix miz aen nanq gaeng, dij Sen goj jeuq dix, dij Sen hawj dix miz aen gvai, hawj laux hongz Aizjih ngaiq dix. Laux hongz hawj dix gvanx daengz Aizjih daj rownz laux hongz nauq. ¹¹Doaklaeng, Aizjih daj daengz ndaw Zaznanh nauq kaeujpyaek mboq yawz, zoah zwzyaeg, miz nanq dwx. Puj jeq rownz raeuz kaeuj nauq, ¹²Yaqgowh ruxnyinz Aizjih miz kaeuj leux, zoq nemzle lug zaiz dix zoq zawh puj jeq rownz raeuz bae Aizjih swx kaeuj, baez naeh zawh baez nduq. ¹³Baez daih ngih paenqdix bae Aizjih, Yezsowh zux haxdoq le bihnongx zaiz dix dix zawh Yezsowh, laux hongz goj zux ruxndeq le bihnongx zaiz rownz Yezsowh. ¹⁴Yezsowh zoq nemz le bihnongx zaiz dix mwz qingj dez dix Yaqgowh daj daengz rownz jiatsip-haj goanz daeuj dih dix naeh. ¹⁵Yaq, Yaqgowh bae Aizjih ndowj, doaklaeng puj jeq rownz raeuz daengz Yaqgowh daengz rawz yuq ndaw Aizjih tai. ¹⁶Luglan paenqdix aeu paenqdix maz ndaw Swqjenq, aeu moak ndaw mohbujreuh dih Yaqboahlazhanq aeu ngaenz swx daeq luglan Hazmoah maz naeh.

^x7:3 Gaemz kauq naeh haecz yuq Sw Zwz nduq 12:1.

^y7:4 Dij goanz Zazlowhdix yuq ndaw Maexsoahbuqdahmixyaq ndowj, gannaeh rongx hoak Yizlazkowh.

^z7:6 Gaemz kauq naeh haecz yuq Sw Zwz nduq 15:13.

^a7:7 Gaemz kauq naeh haecz yuq Sw Zwz nduq 15:14; Sw Ni Aizjih 3:12.

*7:8 Zwz Nduq 17:9.

¹⁷"Zaekgaj taeng sowh zwz dij Sen yinq Yaqboahlazhanq naeh, dij goanz Yixsowhleh yuq ndaw Aizjih gaj laeng gaj raengh, ¹⁸taengdiak zwz Aizjih miz laux hongz mawq ux mboq ruxndeq suq saeh Yezsowh naeh saek'i.^b ¹⁹Dix goix taeuq hoak mbowq dwk puj jeq rownz raeuz, vazkuz dij goanz raeuz, bih paenqdix aeu lug eng viangh, mboq hawj lug eng zaeu. ²⁰Sowh zwz naeh, Moahciz zoq taennaj, yuq ndaw zaw dij Sen, dij Sen aeu dix hoak goanz ux.^c Bohmeh Moahciz lupliamx yuq ndaw rownz zowngx dix ndaej sam ndown. ²¹Doaklaeng, aeu dix bae nyaengx haenz dah, lug nyingz laux hongz Aizjih zaep dix mwz, aeu dix hoak lugzowngx. ²²Dij goanz Aizjih rux hoak gaeng, Moahciz goj zau rux hoak nauq, rux hax kauq daj rux hoaksaeh taeuq. ²³Bi dix ndaej siqsip bi naeh, dix zawx haeggaj ta'taen dij goanz Yixsowhleh dix singjringh, dix zoq mwz. ²⁴Dix mwz taeng dih paenqdix naeh, dix leztaen miz goanz Aizjih ux qiz dij goanz Yixsowhleh dix. Dix jih laeng goanz zoah qiz naeh, zoq kaj goanz Aizjih naeh tai. ²⁵Moahciz faeklah dij goanz Yixsowhleh dix ruxndeq dij Sen aeu mungz dix jeuq paenqdix, gaj dij goanz Yixsowhleh mboq ruxndeq. ²⁶Vaenzlaeng, dix leztaen song goanz Yixsowhleh dungzsaeuh, zoq chownq paenqdix dungzndae, dix hax: 'Gaenqsu gawz goj zawh dij goanz Yixsowhleh, baenzzaqrawz naengz

dungzdup mux?' ²⁷Gaj goanz haeggaj qiz dij goanz Yixsowhleh hoakri naeh ngex Moahciz ni, hax: 'Gawz hawj mawz hoak puj saeq dwx piu ah? Gawz hawj mawz hoak puj saeq paeg saeh piu ah? ²⁸Nazniz mawz daz kaj gux daj vaenzvaz mawz kaj goanz Aizjih naeh dungzlumj wx?'^d ²⁹Moahciz ruxnyinz gaemz kauq naeh, zoq lenh gowx mwz ndaw Mixdenq, yuq dihnaeh dex ndowj. Doaklaeng, dix miz song goanz lug zaiz. ³⁰Gvaq ndaej siqsip bi, yuq ndaw doanghmowz Bo Ciznaiq, miz goanz bin dij Sen ux yuq ndaw bungz maexnam miz faez naeh hawj Moahciz taen. ³¹Moahciz taen sowh saeh mboq sanz taen naeh, dix sawz taeuq, dix zawx leztaen singjringh. Dix zoq daeq mwz naj, gau dix naengz mwz mboq taeng naeh, miz hiang kauq Zaeuj daj dix hax: ³²'Gux zawh dij Sen puj jeq rownz mawz, zoq zawh dij Sen Yaqboahlazhanq, Yitsaeg, Yaqgowh naeh.'^e Moahciz saenq raeuhraeuh, mboq ganz ngangh to lez. ³³Zaeuj daj dix hax: 'Tod haiz mawz, unj, dih mawz in naeh zawh dih dij Sen. ³⁴Dij goanz gux yuq ndaw Aizjih ndaej jinkaem baenzzaqrawz, gux leztaen singjringh, hiang paenqdix gongz, gux goj ruxnyinz yaq, gux loangz daeuj jeuq paenqdix. Mawz maz! Gux nemz mawz dauh bae Aizjih.'^{*} ³⁵Goanz Moahciz naeh zoq zawh goanz dij goanz Yixsowhleh viangh dix, jinx dix hax 'Gawz hawj mawz hoak puj saeq dwx piu daj puj saeq paeg

^b7:18 Gaemz kauq naeh haenz yuq Sw Ni Aizjih 1:8.

^c7:20 Gaemz kauq naeh goj rux hax: *Sowh zwz naeh, Moahciz zoq taennaj, dix chaekzaemz taeuq.* Lez ndaw Sw Ni Aizjih 2:2.

^d7:28 Gaemz kauq naeh haenz yuq Sw Ni Aizjih 2:14.

^e7:32 Gaemz kauq naeh haenz yuq Sw Ni Aizjih 3:6.

^{*}7:34 Ni Aizjih 3:7-8; 10.

sah piu ah?’ Gaj dij Sen hawj goanz bin dij Sen yuq ndaw bungz maexnam hawj Moahciz leztaen naeh lowg Moahciz, hawj dix hoak saeq dwx, hoak goanz jeuq dij goanz Yixsowhleh naeh.

³⁶ Goanz Moahciz naeh lingz dij goanz Yixsowhleh daeq Aizjih og daeuj, zwz yuq ndaw Aizjih naeh, zwz gvaq Haij Ndiang naeh, siqsip bi yuq ndaw doanghmowz naeh, dix hoak sowh saeh mboq sanz taen naeh daj sowh saeh ndaw fax naeh lai taeuq.

³⁷ Goanz Moahciz naeh daeklaeng goj hoakzaqnaeh haxdoq dij goanz Yixsowhleh: ‘Bae'naj dij Sen rux yaeuj bihnongx su goanz ux hoak puj zawxkauq dix, daj gux dungzlumj.’^f ³⁸ Goanz Moahciz naeh ndaej yuq ndaw doanghmowz daj daengzle dij goanz Yixsowhleh zaemh yuq, zoq zawh hax daj puj jeq rownz raeuz zaemh yuq. Dix yuq ndaw Bo Ciznaiq daj goanz bin dij Sen daj dix hax kauq naeh zaemh yuq, dix ndaej biaknyinz sowh kauq hawj dij goanz ndaej aen mingh naeh yaq aeu hawj raeuz. ³⁹ Puj jeq rownz raeuz mboq venq biak dix, naengz viangh dix, ndaw zaw ueq bae doq Aizjih. ⁴⁰ Paenqdix daj Yaqlunh hax: ‘Laux Moahciz laux naeh, lingz gaenqpiu daeq Aizjih og daeuj, piu mboq ruxndeq dix gannaeh mex zoah gaeng saeh, mawz chauq jij yowngh sen ux, hawj paenqdix lingz loh piu.’^g ⁴¹ Yaq paenqdix hoak do moaz jim ux, mbud do moaz jim naeh, hoak gaenqnaeh

naengz faengz nyauznyauz. ⁴² Dij Sen ueqnaj ni paenqdix, jizzaz paenqdix mbud tang'vaenz, aen hai, gaenq ndaw fax. Daj Sw puj zawxkauq dij Sen mai naeh dungzlumj:

“Yixsowhleh aj, siqsip bi su yuq ndaw

doanghmowz naeh,

su aeu doihdo daj sowh gaenq aeu mbud naeh

mbud hawj gux vah?

⁴³ Gaenqsu tam zangjpungh Moahloah, ndaundiq

Lixpanz,^h

zoq zawh sowh gaenq su aeu hoak dij sen su

mbud naeh,

naengz mboq venq aeu le gaenqnaeh viangh.

Baenzaqnaeh, gux daem su ni dih ux naengz

gvae nyeuz Bazbixlunh.’ⁱ

⁴⁴ “Puj jeq rownz raeuz yuq ndaw doanghmowz, miz aen zangjpungh dij Sen, aen zangjpungh naeh ndaw dix miz aen gvih dungzdingq gaengnaeh, aen zangjpungh naeh zawh Moahciz hoakzaq sowh rangh YEZ'HOAHHUAH yaix dix naeh hoak. ⁴⁵ Aen zangjpungh naeh, puj jeq rownz raeuz zoh aeu hawj zoh. Zwz dij Sen yuq doqnaj paenqdix daem dij goanz yowngh ndai ni naeh,* paenqdix daj Yezsuzyaq ban aen zangjpungh naeh mwz dih dij Sen aeu hawj paenqdix hoakjin naeh, taengdeg

^f7:37 Gaemz kauq naeh haeuz yuq Sw Faxlih Daih Ngih 3:6.

^g7:40 Gaemz kauq naeh haeuz yuq Sw Ni Aizjih 32:1; 23.

^h7:43 Moahloah daj Lixpanz zawh song aen minxzhw dij sen zaj. Dij goanz Zaznanh rongx tang'vaenz hoak dij sen paenqdix, minxzhw zoq rongx hoak Moahloah. Dij goanz Aizjih aeu ndaundiq hoak dij sen, minxzhw rongx hoak Lixpanz.

ⁱ7:43 Gaemz kauq naeh haeuz yuq Sw Azmoahswz 5:23-27.

*7:45 Ni Aizjih 25:8-9.

zwz laux hongz Daqvaeq naeh. ⁴⁶ Dij Sen yumq zaemz Daqvaeq, Daqvaeq vanz dij Sen saeh rownz Yaqgowh cha dih ndowj ux.^j ⁴⁷ Gaj doaklaeng, zawh Soaxloahmaenh, goanz lug zaiz Daqvaeq naeh, saeh dij Sen daengj rownz dij Sen. ⁴⁸ Gaj dij Sen dwx nyeuz daengzle naeh mboq ndowj sowh rownz dij goanz daengj naeh. Daj puj zawxkauq dij Sen hax naeh dungzlumj:

⁴⁹ "Zaeuj hax: "Fax zawh daengq gux, dihindin zawh aen daengq aeu sowq dej din gux naeh.

Gaenqsu saeh gux daengj sowh rownz dij Sen rawz mux?

Dih rawz zux zawh dih gux ced mux?

⁵⁰ Ndaw fax daj dihindin daengzle nauq mboq zawh gux haeggaj aeu mungz gux chauq maj?"^k

⁵¹ "Gaenqsu hoz nyaeb gaenq hoak hoan huanh, zaw su daj chu su ding taeuq, daj naengz mboq hoak diauq zauh heh naeh dungzlumj, kwnzkwnz dix Minghkoan dij Sen. Puj jeq rownz su hoakrawz, su goj zaemh hoakrawz. ⁵² Pujzawxkauq dij Sen gawz goj zoah puj jeq rownz su haiq. Pujzawxkauq dij Sen gawz laemh zoah goanz gaemz hax mboq miz naeh,

hax goanz naeh rux daeuj, gawz goj zoah puj jeq rownz su kaj. Gannaeh, goanz paenqdix laemh naeh daeuj, su kai dix, kaj dix tai. ⁵³ Gaenqsu zawh sowh puj ndaej fahlidij dij Sen naeh, fahlidij dij Sen zawh dij Sen hawj bin dix haxdoq su. Gaj gaenqsu mboq biak fahlidij dij Sen."

Goanzlai Aeu Tin Saeuh Sowztihfanx Tai

⁵⁴ Paenqdix biak suq kauq naeh yaq, jih daengz mboq zawh haxnyaeux, gaet faenz maz doq Sowztihfanx. ⁵⁵ Minghkoan dij Sen dumh daengz ndang Sowztihfanx, dix ngangh to lez mwz doq ndaw fax, daengz ta mboq yaep saw, dix leztaen dij Sen miz najta taeuq, goj leztaen Yezsuz in yuq baih qensa dij Sen. ⁵⁶ Sowztihfanx zoq hax: "Gux leztaen fax aj eh, goanz rongx hoak Lug Dij Goanz^l naeh in yuq baih qensa dij Sen!" ⁵⁷ Daengzle caqsiq rongx, paenqdix mboq zawx biak Sowztihfanx hax tem, zoq aeu mungz oat chu hoakri, nyenj mwz doq Sowztihfanx, ⁵⁸ ngex dix bae haenz chaenh, aeu tin saeuh dix. Sowh puj gauq dix naeh tod sowj riz hoakri hawj goanz mbauqreaux ux dawz, goanz mbauqreaux naeh rongx hoak Sauxloah. ⁵⁹ Gau paenqdix aeu tin saeuh naeh, Sowztihfanx rongx: "Yezsuz, Zaeuj aj, vanz mawz deq minghkoan gux ow!" ⁶⁰ Yaq dix gvih bae dihindin, daeuq caqsiq

^j7:46 Gaemz naeh *Sw dij Sen* mbangj bwnz hoakzaqnaeh hax: *Dij Sen zaemz Daqvaeq, Daqvaeq vanz dij Sen hawj dix saeh dij Sen Yaqgowh cha dih ndowj ux.* Zoq zawh hax Daqvaeq vanz dij Sen hawj dij goanz Yixsowhle hax miz aen rownz dij Sen ux.

^k7:50 Gaemz kauq naeh haeuz yuq *Sw Yixsaiqyaq* 66:1-2.

^l7:56 Aen minxzwh **Lug Dij Goanz** naeh yuq *Sw Danqyixlix* 7:13-14. Pujzawxkauq dij Sen, *Danqyixlix*, hax: *Zang'haemh gux daj paen'hwnz dungzlumj leztaen miz goanz ux daj lug dij goanz dungzlumj. Dix kvij pajfax maz dih dij Sen bwnzmiz miz daengznauq naeh. Daenh zoq lingz dix mwz doqnaj dij Sen naeh. Gaenqdix ndaej dawjfax sowh rux gvanx daengzle naeh, gaj goanz gaj biangz dix, gaj goanz gaj biak dix. Hoakzaqnaeh, goh rawz gojvenj, changz rawz gojvenj, dij goanz hax sowh kauq rawz gojndae daengzle biangz dix, nowngz dix. Lug dij Goanz gvanx daenh daengznauq, mboq miz gawz hawj goh dix lown.*

rongx: "Zaeuj aj, paenqdix hoakzaqnaeh dup gux, paenqdix hoakzaqnaeh hoak loang; laek aeu sowh gaenq hoakloang naeh hawj paenqdix tw!" Hax gah, dix zoq tai.

Sauxloah Vazkuz Dij Goanz Zauqhoiq

8¹Daenh kaj Sowztihfanx, Sauxloah goj zoahdowh hoh. Daeq vaenz gaengnaeh mwz, dij goanz zauqhoiq ndaw Yezluqsaxlaengx zoah daenh vazkuz, mizgaj dij goanz zawxkauq Yezsuz, gvaqmaz cohsaenz Yezsuz daengzle nauq byaeg bae mbanj Yaeuhdaq daj mbanj Saxmaxliqyaq dih rawz gojmbaeuq. ²Sowh puj nowngz dij Sen haen laez haen lih naeh mbanj goanz aeu Sowztihfanx bae moak, haej dix vauhvauh. ³Sauxloah daz ndaep dij goanz zauqhoiq, mwz hoak rownz hoak rownz goangz sowh puj sinq Yezsuz naeh, aeu daengz zaiz daengz nyingz kaeng bae ndaw lauz.

Dij Goanz Saxmaxliqyaq Ndaej Ruxnyinz Kauq Dij Sen

⁴Puj sinq Yezsuz sowh puj byaeg bae dihndai naeh, bae taeng rawz zoq aeu kauqfaengz dij Sen laemh dwk rawz. ⁵Faezliq bae Saxmaxliqyaq chaenh, koanx gaenq Jizduz dwk daenh. ⁶Goanzlai biak dix koanx, goj ndaej ta'taen dix hoak sowh saenh yaengh saenh naeh, zoq hoak zawdoag biak kauq dix. ⁷Unj sowh puj zoah dij pi mwz ndang naeh miz goanz lai taeuq, Faezliq saeh paenqdix daem dij pi, dij pi caqsiq rongx, zoq daeq ndaw ndang paenqdix og daeuj. Naengz miz sowh puj chaej ndang nyaeb chaeg mboq baenz naeh, puj ka'ndiak, goanz lai taeuq, dix goj ya paenqdix ndae

nauq. ⁸Yuq ndaw Saxmaxliqyaq chaenh, dij goanz dih naeh faengz nyauznyauz.

⁹Miz goanz ux, minxzwh rongx hoak Cizmaenh, dix daeq ndowj maz bwnz yuq ndaw chaenh naeh hoakbang. Dix hax hoakri dix haen zawzmboqraeuh, dix hoakbang hawj dij goanz ndaw chaenh menq zaemz menq sawz. ¹⁰Dij goanz ndaw chaenh, pujdwx puj'ix daengzle biak dix nauq, daenh hax: "Goanz naeh haen taeuq, zawh doakriangz dwx dij Sen." ¹¹Dix daeq ndowj maz, dix hoakbang, daenh menq zaemz menq sawz, baenzzaqnaeh, dij goanz ndaw chaenh caqsiq biak sowh dix hax naeh. ¹²Doaklaeng, Faezliq laemh sowh kauqfaengz laemh goh dij Sen daj laemh Yezsuz Jizduz naeh, laemh dwk paenqdix, paenqdix sinq, puj zaiz puj nyingz goj maz hoak diauq zauh soiq naeh. ¹³Cizmaenh hoakri dix goj sinq, dix goj maz hoak diauq zauh soiq naeh, kwnz daj Faezliq zaemh yuq. Dix taen Faezliq hoak sowh saeh saenh yaengh saenh naeh daj hoak sowh saeh miz riangz dwx naeh, menq zaemz menq sawz.

¹⁴Dij goanz zawxkauq Yezsuz yuq ndaw Yezluqsaxlaengx ruxnyinz puj Saxmaxliqyaq biak kauqfaengz dij Sen, zoq nemz Bihdowh daj Yezhanq bae dih puj Saxmaxliqyaq naeh. ^{15–16}Zwz puj Saxmaxliqyaq hoak diauq zauh soiq naeh, paenqdix zux aeu gaj zwh Yezsuz Zaeuj hoak diauq zauh soiq naeh, Minghkoan dij Sen naengz mboq daeuj ndang paenqdix. Baenzzaqnaeh, Bihdowh daj Yezhanq bae taeng yaq, saeh paenqdix daj dij Sen hax kauq, hawj paenqdix ndaej Minghkoan dij Sen. ¹⁷Bihdowh daj Yezhanq aeu mungz baed bae now paenqdix, paenqdix zoq ndaej Minghkoan dij Sen.

¹⁸ Cizmaenh taen dij goanz zawxkauq Yezsuz daeh aeu mungz baed, dij Sen zoq aeu minghkoan dij Sen hawj, dix zoq aeu jenz hawj dij goanz zawxkauq Yezsuz, ¹⁹ dix hax: "Vanz su aeu sowh qenhliq naeh hawj gux, hawj gux aeu mungz baed gawz, gawz zoq ndaej Minghkoan dij Sen." ²⁰ Bihdowh hax: "Mawz daj jenz mawz zaemh lown ndeh! Unj mawz gaenq faeklahi sowh gaenq dij Sen yumq aeu hawj naeh aeu jenz swx baenz wzngah!" ²¹ Yuq doqnaj dij Sen sai'zaw mawz mboq hoj, mboq hawj mawz daj piu zaemh hoak eh. ²² Mawz hoak loang yauq rux gaix, ni gaenqndog, vanz Zaeuj, mbanjbaez Zaeuj rux yangq gaenqndog ndaw zaw mawz. ²³ Unj gux lez ndaej og, mawz naengzgaj ta'ndaem daenh taeuq, zoah gaenq ndog nwk." ²⁴ Cizmaenh hax: "Vanz su saeh gux vanz Zaeuj, hawj sowh saeh gaenqsu hax naeh, mboq miz saek yowngh daeuj ndaw ndang gux."

²⁵ Daeklaeng, Bihdowh daj Yezhanq saengq paenqdix, doiqdix goj koanx kauqfaengz Zaeuj dwk daenh, yaq paenqdix dauh maz Yezluqsaxlaengx, doanh loh, paenqdix bae mbanj Saxmaxliqyaq lai longq taeuq koanx kauqfaengz dij Sen.

**Faezliq Koanx Kauqfaengz Dwk
Goanz Ndaw Yizsoahpihyaq Ux**

²⁶ Miz vaenz ux, bin dij Sen daeuj daj Faezliq hax: "Bae ndeh, mawz bae baih nanhfangz, daeq ka Yezluqsaxlaengx bae Zazsah chaenh naeh bae." Ka naeh zawh ndaw doanghmowz. ²⁷ Faezliq cenq loangzdin bae. Doanh loh, dix mex goanz dij goanz Yizsoahpihyaq ux, goanz naeh zawh sowh puj don

yaq hoak saeq dwx taeuq naeh, dix yuq baihdawj Ganzdaqjiz yah hongz Yizsoahpihyaq naeh gvanx ngaenz, dix mwz Yezluqsaxlaengx biangz dij Sen dauh daeuj. ²⁸ Dix naengh ndaw chowz, doag sw puj zawxkauq dij Sen gut Yixsaiqyaq laiz naeh. ²⁹ Minghkoan dij Sen nemz Faezliq: "Mawz daeq mwz naj, daeq mwz haenz aen chowz gaengnaeh!" ³⁰ Faezliq lenh mwz haenz goanz gaengnaeh, ruxnyinz dix doag sw puj zawxkauq dij Sen gut Yixsaiqyaq laiz naeh, zoq cham dix: "Mawz ruxndeq gaenq mawz doag naeh zawh hax gaeng vah?" ³¹ Dix yaeng: "Mboq miz gawz yaix gux, gux hoakrawz ruxndeq ah?" Yaq dix qingj Faezliq mwz ndaw chowz daj dix zaemh naengh. ³² Gaenq gaundug dix doag naeh zawh:

"Dix daj sowh dij mbej zoah daenh zung mwz kaj
naeh dungzlumj,
dix goj daj sowh dij mbej ix zoah daenh daek
koan naeh dungzlumj,
dix yumq hoakzaqnaeh byaek rik byaek rih,
dix yumq hoakzaqnaeh mboq aj baeg.
³³ Dix zoah daenh lez uaj,
daenh paeg saeh dix paeg mboq piang.
Daenh kaj dix tai, dix mboq miz lug,
mwznaj mboq miz gawz rux laemh luglan
dix."^m

³⁴ Goanz don yaq naeh cham Faezliq: "Cham mbaed ux, suq kauq puj zawxkauq dij Sen inxnaeh hax naeh zawh hax gawz ah? Zawh goanz laiz naeh haeggaj hax hoakri dix rux hax daenh ah?" ³⁵ Faezliq aj baeg,

^m8:33 Gaemz kauq naeh haeuz yuq Sw Yixsaiqyaq 53:7-8.

daeq le gaemz gaundiq naeh goq daeuj daeuj, aeu kauqfaengz Yezsuz koanx dwk dix. ³⁶ Doiq dix daeq mwz baihnaj, mwz taeng dih ux miz naemx, goanz gaengnaeh hax: "Mawz lez, inxnaeh miz naemx, gux hoak diauq zauh soiq naeh mboq miz gaeng naeujbojleh?" ³⁷ ⁿ³⁸ Yaq dix yaix chowz ced, song goanz dix zaemh loangz bae ndaw naemx, Faezliq saeh dix hoak diauq zauh soiq naeh. ³⁹ Gau paenqdix daeq ndaw naemx kwnj maz naeh, minghkoan Zaeuj yaeuj Faezliq mwz, goanz gaengnaeh zoq lez mboq taen Faezliq. Yaq dix daeq mwz naj, ndaw zaw faengz nyauznyauz. ⁴⁰ Doaklaeng miz dij goanz yuq ndaw Yaqsoaxduz taen Faezliq, Faezliq yuq dih naeh, longq dwx longq ix, koanx kauqfaengz dij Sen dwk daenh, bae taengdeg Kaixsaxliqyaq chaenh.

Sauxloah Dauh Maz Sinq Yezsuz

9 ¹ Sauxloah naengz gaj cog dij goanz Zaeuj, hax jixzawh paenqdix naengzgaj nowngz Yezsuz, dix zoq kaj paenqdix. Dix mwz dih goanz gvanx puj mbud dij Sen saeq dwx nyeuz daengzle naeh, ² hawj goanz naeh laiz sw bae le aen rownzndawcowq ndaw Daqmaxseqgohw chaenh naeh, hawj dij goanz dih naeh goangz sowh dij goanz sinq Yezsuz naeh, puj zaiz gojndae, puj nyingz gojndae, hawj dix puk dauh maz ndaw Yezluqsaxlaengx. ³ Gau dix zaekgaj bae daeux Daqmaxseqgohw naeh, hubhaeb miz longz ux daeq ndaw fax zauq daeuj doq dix, zauq zoah daengz ndang dix nauq. ⁴ Dix laemx bae dihndin, ruxnyinz miz hiang kauq daj dix hax: "Sauxloah, Sauxloah, mawz baenzaqrawz vazkuz gux?" ⁵ Dix

hax: "Zaeuj aj, mawz zawh gawz ah?" Zaeuj yaeng: "Gux zawh Yezsuz goanz zoah mawz vazkuz naeh. ⁶ Mawz dwnq maz, mwz ndaw chaenh, miz dij goanz haeggaj haxdoq mawz, mawz hoj hoak gaeng." ⁷ Sowh puj zaemh daeq naeh in yuq dih gaengnaeh, hax kauq mboq baenz, ruxnyinz gaj hiang kauq, lez mboq taen gaeng. ⁸ Sauxloah dwnq ndaw dihndin maz, ndowngqta, gaj gaeng goj lez mboq taen. Sowh puj daj dix zaemh daeq naeh, zung mungz dix, lingz dix mwz ndaw Daqmaxseqgohw. ⁹ Sam vaenz dungzdam, ta dix mbud, lez mboq taen gaeng, dix mboq jin gaeng, goj mboq ndut gaeng.

¹⁰ Sowh zwz naeh, yuq ndaw Daqmaxseqgohw chaenh miz goanz cohsaenz ux rongx hoak Yaqnahnihyaq. Zaeuj hawj dix daj paen'hwnz dungzlumj, ruxnyinz Zaeuj daj dix hax: "Yaqnahnihyaq." Dix yaeng: "Zaeuj aj, gux yuq inxnaeh." ¹¹ Zaeuj hax: "Mawz mwz ka loh ka rongx hoak 'Ka Loh Sw' naeh, yuq rownz Yaeuhdaq, dih naeh miz goanz ux rongx hoak Sauxloah, dix zawh dij goanz ndaw Daqsuq chaenh. Gannaeh dix daj gux hax kauq. ¹² Gux hawj dix daj paen'hwnz dungzlumj, taen goanz ux rongx hoak Yaqnahnihyaq, ndonj mwz aeu mungz baed ndang dix, hawj ta dix daeuq rux leztaen." ¹³ Yaqnahnihyaq yaeng: "Zaeuj aj, gux ruxnyinz goanz lai taeuq hax, goanz naeh yuq ndaw Yezluqsaxlaengx hoakrawzraeuh vazkuz dij goanz mawz. ¹⁴ Mbaed naeh dix maz, miz mbaw sw goanz gvanx puj mbud dij Sen saeq dwx nyeuz daengzle naeh, mbaw sw naeh hawj dix goangz sowh dij

^{8:37} Mbangj bwnz miz gaemz naeh: *Faezliq hax: "Nanghgaj mawz aeu daengz zaw sinq, zoq hoak diauq zauh soiq naeh baenz."*
Dix yaeng: "Gux sinq Yezsuz Jizduz zawh lug zaiz dij Sen!"

goanz aeu mawz hoak dij Sen maengx naeh." ¹⁵ Gaj Zaeuj daj Yaqnahnihyaq hax: "Mawz yumq mwz, dix zawh dij goanz gux lowg, dix rux aeu gaenq gux koanx dwk sowh dij goanz mboq zawh puj Yaeuhtaiq naeh daj puj hoak hongz paenqdix, daj luglan Yixsowhle. ¹⁶ Gux rux hawj dix ruxndeq, dix rux cholaeng zwh gux ndaej jinkaem lai taeuq." ¹⁷ Yaqnahnihyaq zoq mwz, dix ndonj mwz rownz gaengnaeh, aeu mungz baed ndang Sauxloah, hax: "Sauxloah laux goz aj, Yezsuz goanz yuq ka loh hawj mawz taen naeh, zoq zawh Zaeuj, dix nemz gux maz, hawj mawz daeuq rux leztaen, goj hawj Minghkoan dij Sen dumh daengz ndang mawz." ¹⁸ Sowh gau naeh, ta Sauxloah miz naeng baenz laeb baenz laeb doak daeuj, dix zoq rux leztaen, yaq dix hoak diauq zauh soiq naeh. ¹⁹ Jinkauej yaq, dix zoq miz doakriangz, zaengx daj mbaednduq dungzlumj.

Sauxloah Yuq Ndaw Daqmaxseqgowh

Koanx Zaeuj Dwk Daenh

Dix daj cohsaenz ndaw Daqmaxseqgowh zaemh ndowj jij vaenz ux yaq, ²⁰ dix cenq mwz rownzndawcowq, bae hoak aen aen haxdoq daenh, haxdoq daenh Yezsuz zawh lug zaiz dij Sen. ²¹ Sowh puj ruxnyinz naeh gaj goanz gaj sawz taeuq, hax: "Goanz yuq ndaw Yezluqsaxlaengx vazkuz dij goanz Yezsuz naeh zawh dix ejmax? Dix maz inxnaeh zawh goangz dij goanz sowh puj aeu Yezsuz hoak dij Sen maengx naeh, aeu paenqdix hawj goanz gvanx puj mbud dij Sen saeq dwx nyeuz daengzle naeh wzmax?" ²² Gajlej Sauxloah gaj laeng gaj miz doakriangz, dix hax bex

puj Yaeuhtaiq sowh puj yuq ndaw Daqmaxseqgowh ndowj naeh, zaenqminh Yezsuz zoq zawh Jizduz.

Puj Yaeuhtaiq Daz Haiq Sauxloah

²³ Gvaq ndaej ndauj ux yaq, puj Yaeuhtaiq dungzlaemh, daz kaj Sauxloah. ²⁴ Paenqdix vaenzlinzhwnz yuq baeglongq taj, daz kaj Sauxloah, gaj zoah Sauxloah ruxndeq daekgoanq. ²⁵ Zang'hwnz, cohsaenz Sauxloah zoq aeu goi dwx kven dix loangz bae baihnog bowng'jingz homx haenz chaenh naeh. ²⁶ Sauxloah mwz taeng Yezluqsaxlaengx yaq, dix daz daj cohsaenz Yezsuz bae'dauh, gaj paenqdix mbu dix, mboq sinq dix zawh cohsaenz Yezsuz. ²⁷ Mizgaj Baznahbaz daj dix bae'dauh, Baznahbaz zowz dix mwz dih dij goanz zawxkauq Yezsuz naeh. Baznahbaz haxdoq paenqdix, Sauxloah yuq doanhloh hoakrawz mex Zaeuj, Zaeuj hoakrawz daj dix hax kauq, yuq ndaw Daqmaxseqgowh dix hoakzawz miz to'zaw taeuq aeu gaenq Yezsuz koanx dwk daenh, gaj yowngh gaj laemh. ²⁸ Yaq Sauxloah yuq ndaw Yezluqsaxlaengx daj cohsaenz Yezsuz bae'dauh. Dix miz to'zaw taeuq aeu gaenq Yezsuz koanx dwk daenh, ²⁹ dix daj puj Yaeuhtaiq sowh puj goak kauq Cizlah naeh dungzjinj, gaj paenqdix daz kaj dix. ³⁰ Bihnongx ndai ruxndeq, zoq soangq dix bae Kaixsaxliqyaq, yaix dix bae goakrownz dix, Daqsuq.

³¹ Zwz naeh, dij goanz zauqhoiq ndaw mbanj Yaeuhdaq, mbanj Zazliqliq, mbanj Saxmaxliqyaq, le dih naeh yuqvangq, gaj laeng gaj daeq ka loh Zaeuj naeh vwnxcih, paenqdix gaj laeng gaj ruxndeq mbu

dij Sen, Minghkoan dij Sen gaj laeng gaj byongz paenqdix, dij goanz gaj laeng gaj miz lai.

Aen Chaej Yixnihyaq Ndae

³² Bihdowh bae dih bae dih, dix ndaej bae Loixdaq dih dij goanz Yezsuz naeh. ³³ Zwz dix yuq Loixdaq naeh, dix mex goanz ux minxzwh rongx hoak Yixnihyaq, goanz naeh baenz sowh chaej chaeg mboq baenz naeh, yuq ndaw tanj noanz ndaej biad bi. ³⁴ Bihdowh daj dix hax: "Yixnihyaq, Yezsuz Jizduz ya mawz ndae yah, dwnq maz, jip faz mawz ndeh!" Yixnihyaq cenq dwnq maz. ³⁵ Dij goanz ndaw Loixdaq daj dij goanz ndaw Sazlunh paenqdix leztaen Yixnihyaq ndae, daengzle zoq sinq Zaeuj.

Dozzaz Daeuq Zaeu

³⁶ Yuq ndaw Yezpaq chaenh miz goanz cohsaenz Yezsuz nyingz ux, minxzwh rongx hoak Daqbixdaq, aeu kauq Cizlah rongx hoak Dozzaz. Goanz naeh kwnzkwnz hoak saeh ndae, saeh puj baenzluk. ³⁷ Zwz naeh, dix baenzchaej tai, miz dij goanz soiq dix yaq, aeu dix nyaengx gowh baihnow. ³⁸ Loixdaq daj Yezpaq song dih naeh yuq dungzzawj, cohsaenz Yezsuz ruxnyinz Bihdowh yuq ndaw Loixdaq, zoq nemz song goanz bae dih dix naeh, vanz dix: "Vanz mawz cenq daj piu bae dih piu." ³⁹ Bihdowh zoq daj paenqdix zaemh bae. Bae taeng yaq, miz dij goanz lingz dix mwz gowh baihnow. Sowh yah po haeuz tai yaq naeh daengzle in yuq haenz Bihdowh haej, aeu sowh ndangnungh zwz Dozzaz naengz zaeu hoak naeh, sowj na, sowj mbang, aeu hawj Bihdowh lez.

⁴⁰ Bihdowh yaix daengzle og bae baihnog, hoakri dix gvih daeuj vanz dij Sen, yaq ueq maz daj goanz puj tai naeh hax: "Daqbixdaq, dwnq maz!" Goanz gaengnaeh zoq ndowngqta, leztaen Bihdowh, zoq dwnq maz naengh. ⁴¹ Bihdowh ed mungz fowz dix dwnq maz, yaix paenq dij goanz Yezsuz naeh daj sowh yah po haeuz tai yaq naeh ndonj maz, aeu Dozzaz goanz daeuq zaeu naeh hawj paenqdix. ⁴² Mbaed saeh naeh leuz daengz Yezpaq chaenh nauq, zoq miz dij goanz lai taeuq sinq Zaeuj. ⁴³ Yaq Bihdowh yuq ndaw Yezpaq, rownz Cizmaenh goanz hoak zanghnaeng naeh ndowj yowngh ndauj.

Dij Sen Yaix Bihdowh Bae

Dih Gowznhleuh Naeh

10 ¹ Yuq ndaw Kaixsaxliqyaq chaenh miz goanz ux minxzwh rongx hoak Gowznhleuh, dix hoak leanhzangx, aen buqdoiq paenqdix rongx hoak Yiqdaqliq. ² Dix nowngz dij Sen haen laez haen lih, dix daj daengz rownz dix ruxndeq mbu dij Sen.^o Dix saeh puj baenzluk lai taeuq, kwnzkwnz daj dij Sen hax kauq. ³ Miz vaenz ux, teq zang'vaenz sanz denx ux naeh, dij Sen hawj dix daj paen'hwnz dungzlumj, leztaen goanz bin dij Sen ux daeuj dih dix naeh singjringh, daj dix hax: "Gowznhleuh!" ⁴ Gowznhleuh mbu taeuq, lez dix daengz ta mboq yaep saw, hax: "Zaeuj aj, gaeng saeh ah?" Bin dij Sen yaeng dix: "Suq kauq mawz daj dij Sen hax naeh dij Sen haeuz ruxnyinz, mawz saeh puj baenzluk dij Sen goj haeuz leztaen, dix aeu nyaengxzaw taeuq. ⁵ Gannaeh, mawz nemz

^o10:2 Gowznhleuh mboq zawh puj Yaeuhtaiq, dix goj mboq hoak diauq zauh heh naeh. Hoakzaqnaeh dix goj mboq ndaej ndonj mwz rownz dij Sen. Gaj dix rongx Yez'hoahhuah hoak dij Sen dix.

dij goanz bae Yezpaq, qingj Cizmaenh, goanz goj rongx hoak Bihdowh naeh, maz. ⁶Dix yuq rownz Cizmaenh goanz hoak zangh naeng naeh ndowj, rownz Cizmaenh yuq haenz haij." ⁷Bin dij Sen ni mwz yaq, Gowznhleuh zoq rongx maz sam goanz, miz song goanz zawh puj koj ndaw rownz dix. Miz goanz ux zawh bin dix, goanz bin naeh goj nowngz dij Sen haen laez haen lih. ⁸Gowznhleuh taen gaeng goj haxdoq paenqdix, yaq nemz paenqdix bae Yezpaq.

⁹Vaenzlaeng, teq sowh gau baenz ngaiz ux naeh, paenqdix zaekgaj bae daeux Yezpaq. Sowh gau naeh Bihdowh kwnj mwz nyiangzrownz daj dij Sen hax kauq. ¹⁰Dix dongxyaeg, zawx jin ngaiz. Gau rownz gaengnaeh hoak ngaiz naeh, dij Sen hawj Bihdowh daj paen'hwnz dungzlumj, ¹¹leztaen fax aj, miz yowngh ux doak daeuj, daj kvaix paeng dwx ux dungzlumj, puk siq jimq dix daeuj dihndin. ¹²Ndaw dix miz do siq ka, do rux zanz, dij noag. ¹³Miz hiang kauq daj dix hax: "Bihdowh, dwnq maz kaj paenqdix jin ndeh!" ¹⁴Gaj Bihdowh hax: "Zaeuj aj, baenz mboq ndaej oh! Gux mboq sanz jin sowh fahliah Moahciz hax mboq zauh jin naeh, hax zawh gaeng mboq saw naeh." ¹⁵Daeuq miz hiang kauq daj dix hax: "Dij Sen haeuz hawj dix saw, mboq jinx mawz aeu dix hoak sowh gaeng mboq zauh jin naeh." ¹⁶Hoakzaqnaeh hax sam mbaed dungzdam yaq, kvaix paeng gaengnaeh zoq cenq caeu dauh mwz ndaw fax. ¹⁷Gau Bihdowh naengz mboq ruxndeq hoakrawz hoak, naengz mboq ruxndeq gaeng dij Sen hawj dix taen naeh zawh hax gaeng naeh, sowh dij goanz Gowznhleuh nemz maz naeh hiamq maz taeng rownz Cizmaenh, yuq baihnog baegdu

in. ¹⁸Paenqdix caqsiq rongx: "Miz mboq miz saek goanz rongx hoak Cizmaenh Bihdowh yuq inxnaeh ndowj?" ¹⁹Gau Bihdowh naengz nwh gaeng dij Sen hawj dix taen naeh, Minghkoan dij Sen daj dix hax: "Miz sam goanz maz cha mawz!" ²⁰Loangz bae ndeh, daj paenqdix zaemh mwz, laek nwh gaeng, unj, paenqdix zawh gux nemz maz." ²¹Yaq Bihdowh loangz bae dih paenqdix naeh, hax: "Gux zoq zawh goanz su cha naeh, gaenqsu cha gux hoak gaeng ah?" ²²Paenqdix hax: "Goanz leanhjangx rongx hoak Gowznhleuh naeh zawh sowh puj gaemz hax mboq miz naeh, dix ruxndeq mbu dij Sen, puj Yaeuhtaiq daengzle lezndaejqix dix. Miz goanz bin dij Sen ux yaix Gowznhleuh, hawj dix qingj mawz mwz rownz dix, biak mawz koanx." ²³Bihdowh qingj paenqdix mwz ndaw rownz, ndowj hwnz ux.

Bihdowh Aeu Kauqfaengz Koanx

Dwk Rownz Gowznhleuh

Vaenzlaeng, dix loangzdin daj paenqdix zaemh mwz, dij goanz ndaw zauqhoiq Yezpaq chaenh miz jij goanz ux goj daj dix zaemh mwz. ²⁴Gvaq vaenz ux yaq, paenqdix mwz taeng ndaw Kaixsaxliqyaq chaenh, Gowznhleuh qingj dungzbowh bihnongx maz rownz dix taj paenqdix. ²⁵Bihdowh hiamq ndonj mwz, Gowznhleuh zoq daeuj raep dix, gvih bae doqnaj dix, aeu dix hoak daj dij Sen dungzlumj. ²⁶Bihdowh fowz dix dwnq, hax: "Dwnq maz ndeh, gux goj zawh dij goanz naeuj." ²⁷Bihdowh menq daj dix hax kauq menq ndonj mwz, leztaen miz goanz lai yuq dih naeh. ²⁸Bihdowh zoq daj paenqdix hax: "Gaenqsu ruxndeq, puj Yaeuhtaiq mboq zauh daj puj yowngh ndai bae'dauh. Gaj dij Sen haeuz

yaix gux yaq, mboq jinx aeu gawz hoak puj mboq saw, mboq jinx aeu gawz hoak sowh puj mboq zauh bae'dauh naeh. ²⁹ Baenzaqnaeh, gau su qingj gux maz naeh, gux mboq hax gaemz rawz zoq daj su maz. Gux cham su mbaed'ux, gaenqsu qingj gux maz hoak gaeng?" ³⁰ Gowznihleuh hax: "Daekgoanq siq vaenz zawjraeuz naeh, teq zang'vaenz sanz denx ux naeh, gux yuq ndaw rownz daj dij Sen hax kauq, hubhaeb miz goanz ux nungh sowj kau rux rungh in doqnaj gux, ³¹ daj gux hax: 'Gowznihleuh, dij Sen haeuz ruxnyinz sowh gaenq mawz vanz dix naeh, dix goj leztaen mawz saeh puj baenzluk, dix aeu gaenqnaeh nyaengxzaw taeuq. ³² Mawz nemz dij goanz bae Yezpaq, qingj Cizmaenh goanz goj rongx hoak Bihdowh naeh maz. Dix yuq rownz Cizmaenh goanz hoak zangh naeng naeh ndowj, rownz dix yuq haenz haij.' ³³ Yaq gux cenq nemz dij goanz bae qingj mawz, mawz venq maz, zaemz gvaq ej, gannaeh gaenqpiu yuq doqnaj dij Sen, zawx biak daengzle sowh kauq Zaeuj yaix mawz naeh."

Bihdowh Koanx Kauqfaengz

Dwk Rownz Gowznihleuh

³⁴ Yaq Bihdowh zoq koanx dwk paenqdix: "Gannaeh gux ruxndeq singjringh, dij Sen mboq howj sowh dij goanz rawz nyeuz. ³⁵ Dij Sen zaemz sowh dij goanz ruxndeq mbu dix, sowh dij goanz hoak sowh gaenq gaemz hax mboq miz naeh. Sowh dij goanz naeh, mboq zawh hax gaj puj Yaeuhtaiq, daengz puj yowngh ndai, dij Sen goj toj zaemz paenqdix mboqyaq. ³⁶ Dij Sen yaix Yezsuz Jizduz, Zaeuj daengzle, aeu kauqfaengz haxdoq dij goanz Yixsowhleuh, sowh kauqfaengz naeh hawj dij goanz

daj dij Sen dungzndae baenz. ³⁷ Su ruxndeq, daeq Yezhanq daeuj chownq daenh hoak diauq zauh soiq naeh maz, sowh kauqfaengz naeh daeq mbanj Zazliqliq leuz mwz taeng daengz mbanj Yaeuhdaq nauq. ³⁸ Gaenqsu goj ruxndeq dij Sen hoakrawz aeu Minghkoan daj doakriangz daeuj ndaw ndang Yezsuz ndaw Nazsahlowh. Dij Sen daj dix zaemh yuq, baenzaqnaeh, dix bae dih bae dih, hoak saeh ndae, nanghgaj sowh puj zoah do pi dwx vazkuz naeh, dix ya ndae nauq. ³⁹ Dix yuq dih puj Yaeuhtaiq daj yuq ndaw Yezluqsaxlaengx chaenh hoak gaeng raeuh, piu ndaej ta taen singjringh, goj haxdoq daenh. Gaj paenqdix aeu dix lamh mwz ndaw maex kaj dix tai. ⁴⁰ Vaenz daih sam, dij Sen hawj dix daeuq zaeu, yaq hawj dix og daeuj hawj dij goanz taen. ⁴¹ Mboq zawh hawj daengzle dij goanz taen nauq, mizgaj sowh goanz dij Sen haeuz bwnz lowg hawj paenqdix aeu gaenq dix bae koanx dwk daenh naeh zux ndaej taen, zoq zawh gaenqpiu sowh puj Yezsuz tai yaq daeuq zaeu ndaej daj dix zaemh jin zaemh ndut naeh. ⁴² Dix nemz piu aeu kauqfaengz haxdoq daenh, saengq daenh gaenqdix zawh goanz dij Sen lowg naeh zaeh, dix hoak Zaeuj saenxpanq puj zaeu daj puj tai. ⁴³ Dix zoq zawh goanz puj zawxkauq dij Sen hax naeh, paenqdix goj ndaej hoakzaqnaeh hax: 'Nanghgaj gawz siq dix, gaenq hoakloang gawz zoq cho zwh dix ndaej yangq.'"

Dij Sen Aeu Minghkoan Dix Hawj Sowh Dij

Goanz Mboq Zawh Puj Yaeuhtaiq Naeh

⁴⁴ Gau Bihdowh naengz hax mboq gah naeh, Minghkoan dij Sen daeuj ndang daengzle sowh puj

biak kauqfaengz dij Sen naeh. ^{45–46} Sowh puj sinq Yezsuz, sowh puj hoak diauq zauh heh naeh, zoq zawh sowh puj Yaeuhtaiq daj Bihdowh zaemh maz naeh, paenqdix leztaen dij Sen goj aeu Minghkoan dix dumh bae ndaw puj yowngh ndai, zoq zawh sowh puj mboq hoak diauq zauh heh naeh, paenqdix leztaen sowh dij goanz naeh rux hax sowh kauq mbaednduq mboq rux hax naeh biangz dij Sen. Baenzaqnaeh paenqdix menq zaemz menq sawz. ⁴⁷ Bihdowh daj puj Yaeuhtaiq sowh puj sinq Yezsuz naeh hax: "Ndang paenqdix miz Minghkoan dij Sen, daj gaenqraeuz dungzlumj, gawz ganz mboq hawj aeu naemx saeh paenqdix hoak diauq zauh soiq naeh mux?" ⁴⁸ Dix zoq nemz Gowznihleuh daj dij goanz rownz dix aeu zwh Yezsuz Jizduz hoak diauq zauh soiq naeh. Rownz Gowznihleuh qingj Bihdowh do daj paenqdix ndowj jij vaenz ux tem.

Bihdowh Haxdoq Zauqhoiq

Ndaw Yezluqsaxlaengx

11 ¹ Dij goanz zawxkauq Yezsuz daj bihnongx ndaw zauqhoiq mbanj Yaeuhdaq naeh ruxnyinz puj yowngh ndai biak kauq dij Sen, goj sinq Zaeuj. ² Bihdowh dauh maz taeng Yezluqsaxlaengx, sowh puj sinq Yezsuz sowh puj hax zauh hoak diauq zauh heh naeh zoq daj Bihdowh dungzjinj hax: ³ "Mawz baenzaqrawz bae rownz sowh puj mboq hoak diauq zauh heh naeh yaq naengz daj paenqdix zaemh jinkauej mux?" ⁴ Bihdowh zoq hoak yowngh hoak yowngh haxdoq paenqdix, dix hax: ⁵ "Gau gux yuq Yezpaq chaenh daj dij Sen hax kauq naeh, dij Sen hawj gux daj paen'hwnz dungzlumj, leztaen miz yowngh ux doak daeuj, yowngh naeh daj kvaix

paeng dwx ux dungzlumj, puk siq jimq dix daeq ndaw fax daeuj taengdeg doqnaj gux. ⁶ Gux caqsiq lez, leztaen ndaw dix miz do siq ka daj do ndaw bo, do rux zanz, dij noag. ⁷ Yaq miz hiang kauq daj gux hax: 'Bihdowh, dwnq maz kaj paenqdix jin ndeh!' ⁸ Gux hax: "Zaeuj aj, baenz mboq ndaej oh! Gux mboq sanz jin gaenq mboq saw, zoq zawh sowh fahlh Moahciz hax mboq zauh jin naeh." ⁹ Mbaed daih ngih miz hiang kauq yuq ndaw fax hax: "Dij Sen haeuz hawj dix saw, mboq jinx mawz aeu dix hoak sowh gaenq mboq zauh jin naeh." ¹⁰ Hoakzaqnaeh hax sam mbaed dungzdam yaq, kvaix paeng naeh zoq caeu dauh mwz ndaw fax. ¹¹ Sowh gau naeh, miz sam goanz in yuq baegdu aen rownz piu ndowj naeh. Sam goanz naeh zawh daeq Kaixsaxliqyaq chaenh maz, paenqdix zawh miz dij goanz yaix paenqdix maz cha gux. ¹² Minghkoan dij Sen nemz gux daj paenqdix zaemh bae, yaix gux laek nwh gaeng. Naengz miz choak goanz bihnongx ndaw zauqhoiq naeh daj gux zaemh mwz rownz goanz gaengnaeh. ¹³ Goanz gaengnaeh haxdoq piu dix hoakrawz taen bin dij Sen daeuj rownz dix, bin dij Sen daj dix hax: 'Mawz nemz dij goanz bae Yezpaq chaenh, qingj Cizmaenh goanz goj rongx hoak Bihdowh naeh maz, ¹⁴ dix miz kauq haxdoq mawz, hawj mawz daj daengz rownz mawz ndaej jeuq.' ¹⁵ Yuq rownz goanz gaengnaeh, gau gux hax kauq naeh, Minghkoan dij Sen loangz daeuj ndang paenqdix, daj koax daekgoanq daeuj ndang raeuz naeh dungzlumj. ¹⁶ Gux zoq nwh ndaej gaemz kauq Zaeuj hax naeh: 'Yezhanq aeu naemx saeh daenh hoak diauq zauh soiq naeh, gaj dij Sen aeu Minghkoan dix saeh su hoak diauq zauh soiq naeh.'

¹⁷Dij Sen aeu minghkoan dix hawj dij goanz puj yowngh ndai sowh puj sinq dix naeh, daj koax daekgoanq raeuz sinq Zaeuj raeuz Yezsuz Jizduz, yaq dij Sen aeu minghkoan dix hawj raeuz naeh dungzlumj. Gux zawh gawz ah! Gux ganz dix dij Sen maj?" ¹⁸Daengzle biak suq kauq naeh yaq, zoq byaekrik. Yaq paenqdix biangz dij Sen hax: "Hoakzaqnaeh lez maz, dij Sen goj hawj puj yowngh ndai rux gaix, hawj paenqdix ndaej aen mingh."

Zauqhoiq Anztih'az Chaenh

¹⁹Sowztihtfanx zoah daenh kaj yaq, yuq ndaw Yezluqsaxlaengx cohsaenz Yezsuz zoah daenh vazkuz, goanz ux byaeg bae dih ux. Paenqdix bae mbanj Faeznihtjiz, Saiqpuxluqsez haixdaux,^P Anztih'az chaenh. Paenqdix zwzzwz aeu kauq faengz dij Sen koanx dwk puj Yaeuhtaiq, gaj mboq koanx dwk puj yowngh ndai. ²⁰Gaj paenqdix sowh dij goanz ndaw Saiqpuxluqsez haixdaux daj dij goanz ndaw Guxliqnaiq chaenh naeh, mbanj goanz mwz taeng Anztih'az chaenh aeu kauqfaengz Zaeuj, Yezsuz koanx dwk puj yowngh ndai. ²¹Zaeuj daj paenqdix zaemh yuq, saeh paenqdix, dij goanz dih naeh miz goanz lai taeuq sinq Zaeuj, nowngz Zaeuj. ²²Dij goanz ndaw zauqhoiq Yezluqsaxlaengx ruxnyinz mbaed saeh naeh yaq, paenqdix zoq nemz Baznahbaz bae Anztih'az. ^{23–24}Baznahbaz zawh puj ndae, dix miz Minghkoan dij Sen dumh daengz ndang, dix mizzaw sinq dij Sen taeuq. Baznahbaz bae taeng yaq, leztaen dij Sen yumq hawj dij goanz dihaeh sinq dix baenz, dix zoq zaemz taeuq, dix byongz paenqdix, yaix paenqdix kaem'zaw sinq

Zaeuj, maengx Zaeuj laek zoangq. Yaq puj sinq Zaeuj, nowngz Zaeuj miz lai taeuq. ²⁵Doaklaeng Baznahbaz bae ndaw Daqsuq chaenh cha Sauxloah. ²⁶Cha taen yaq, dix zowz dix mwz Anztih'az chaenh. Paenqdix daj dij goanz zauqhoiq zaemh yuq ndaej bi ux, zau daenh lai taeuq. Cohsaenz Yezsuz rongx hoak "dij goanz Jizduz" zawh rongx daeq ndaw Anztih'az maz. ²⁷Ndauj gaengnaeh, miz jij goanz puj zawxkauq dij Sen ux daeq Yezluqsaxlaengx daeuj Anztih'az. ^{28–30}Le goanz naeh, miz goanz ux rongx hoak Yaqzazbuq. Miz mbaed ux dix daj daengzle zaemh yuq, Minghkoan dij Sen hawj dix ruxndeq, hawj dix hax mwznaj dawj fax rux kaeujpyaek mboq yawz, zoah zwzyaeg. Cohsaenz Yezsuz ruxnyinz yaq zoq gawz aeu hawj gajrawz baenz gawz zoq aeu hawj gajrawz, aeu mwz saeh bihnongx ndaw zauqhoiq sowh dij goanz yuq mbanj Yaeuhdaq ndowj naeh. Paenqdix hawj Baznahbaz daj Sauxloah aeu sowh gaeng paenqdix aeu hawj naeh tw mwz hawj sowh puj gvanx zauqhoiq Yezluqsaxlaengx naeh.

Doaklaeng jeh Gowhlauxdeuz yuq Loahmax hoak hongz naeh zoah zwzyaeg zaeh, daj gaemz Yaqzazbuq hax naeh dungzlumj.

Yaqgowh Zoah Kaj, Bihdowh

Zoah Aeu Mwz Kaeng Lauz

12 ¹Zwz Baznahbaz daj Sauxloah yuq ndaw Anztih'az zau daenh naeh, Cizlih goanz hoak hongz naeh goangz dij goanz zauqhoiq jij goanz ux, vazkuz paenqdix, ²dix naengz aeu remz kaj Yaqgowh goanz goz Yezhanq naeh loaj. ³Dix

taen hoakzaqnaeh hoak puj Yaeuhtaiq zaemz, zoq bae goanz Bihdowh. Zwz naeh zawh Jeng Mboq Miz Fahfaenx.⁹ ⁴Dix aeu Bihdowh kaeng mwz ndaw lauz, hawj siq boangx bin dungzlw h dawz, boangx ux miz siq goanz. Cizlih daz gvaq Jeng Gvaq yaq yuq doqnaj daengzle saenxpanq dix.^r ⁵Bihdowh zoq hoakzaqnaeh yuq ndaw lauz kaeng, dij goanz zauqhoiq caqsiq vanz dij Sen jeuq dix.

⁶Sowh vaenz laux hongz Cizlih daz yuq doqnaj daengzle saenxpanq dix naeh, zang'hwnz dix, Bihdowh zoah aeu song saenj tiksaed puk, noanz jinghzang song goanz bin, baegdu naengz miz bin dawz. ⁷Hubhaeb, miz goanz bin dij Sen ux daeuj haenz Bihdowh in, daengz ndaw lauz rungh nauq. Bin dij Sen aeu mungz daep baihlaeng Bihdowh, hawj dix ruxndownq. Bin dij Sen daj dix hax: "Dwnq naeuz kvaiq ux!" Tiksaed ndaw mungz dix ludlaed nauq. ⁸Bin dij Sen daj dix hax: "Raengx saikvaq, nungh haiz ndae'ndowq." Dix zoq hoakzaqnaeh hoak. Bin dij Sen daeuq hax: "Nungh sowjriz, nowngz gux daeuj!" ⁹Bihdowh zoq nowngz dix daeuj, gaj mboq ruxndeq gaenq bin dij Sen hoak naeh zawh zaeh, naengz faeklah zawh taen sowh gaenq daj paen'hwnz dungz lumj taen naeh. ¹⁰Paenqdix gvaq baegdu daih aet miz bin dawz naeh daj baegdu daih ngih miz bin dawz naeh, maz taeng baegdu liak yuq haenz hw naeh, baegdu liak

naeh haeggaj aj. Paenqdix og daeuj, daeq hangz loh ix ux yaq, bin dij Sen hubhaeb mboq taen.

¹¹Bihdowh zux jinh maz, hax: "Gannaeh gux zux ruxndeq gaenqnaeh zawh zaeh, zawh Zaeuj nemz bin dix daeuj jeuq gux ni dawj mungz Cizlih daj sowh saeh puj Yaeuhtaiq ngwz gux miz naeh."

¹²Dix ruxndeq yaq, dix mwz rownz Maxliqyaq, yah Maxliqyaq naeh zawh meh Yezhanq, maeng goj rongx hoak Maxkowh naeh. Rownz Maxliqyaq miz goanz lai taeuq zaemh yuq daj dij Sen hax kauq. ¹³Bihdowh yuq baegdu baihnog naeh rongx aj du, miz goanz puj koj nyingz ux minxzwh rongx hoak Loahdaq, bae lez. ¹⁴Dix ruxnyinz zawh hiang Bihdowh, faengz daengz lumz aj du saw, lenh mwz haxdoq daengzle, hax Bihdowh in yuq baihnog. ¹⁵Daengzle hax: "Mawz baenzbaeg yah!" Dix daj paenqdix goq hax hax zawh Bihdowh singjringh, gaj paenqdix naengz gaj hax: "Mboq rux zawh Bihdowh gah, zawh bin dij Sen goanz yaz Bihdowh naeh rajnaeuh!" ¹⁶Bihdowh goq rongx rongx ajdu. Paenqdix aj du, leztaen zawh dix, menq zaemz menq sawz. ¹⁷Bihdowh aeu mungz yazyangh, haxdoq laek goak kauq, yaq haxdoq paenqdix Zaeuj hoakzaqrawz lingz dix daeq ndaw lauz og daeuj. Daeuq hax: "Gaenqsu aeu mbaed saeh naeh bae haxdoq Yaqgowh daj daengzle bihnongx

⁹12:3 *Jeng Mboq Miz Fahfaenx* naeh zawh dij goanz Yaeuhtaiq bi ux gvaq gonghhw ux nyen ndaej zwzpujjeq dij Sen zowz paenqdix ni ndaw Aizjih. Zwz paenqdix daeq Aizjih og daeuj naeh, paenqdix zoah dij goanz Aizjih choi ni, baenzaqnaeh paenqdix hoak binx paenqdix baeuh mboq goq aeu fahfaenx dwk.

^r12:4 *Jeng Gvaq* zawh dij goanz Yaeuhtaiq bi ux jin gonghhw ux, nyen dij Sen lingz puj jeq rownz paenqdix ni ndaw Aizjih. Zwz naeh laux hongz Aizjih mboq hawj puj jeq rownz paenqdix ni Aizjih, dij Sen nemz bin dix goanz ux daeuj kaj lug zaiz to sowh dij goanz yuq ndaw Aizjih naeh. Gaj jixzawh baeg du rownz gawz miz lowd dij mbej ix, bin'dijsen zoq gvaq bae, mboq mwz ndaw rownz, kaj lug zaiz to paenqdix. Hoakzaqnaeh zoq rongx hoak "*Jeng Gvaq*."

ndaw zauqhoiq." Hax gah, dix zoq ni dih naeh bae dihdai.

¹⁸Gau fax zaekgaj rungh naeh, sowh bin dawz ndaw lauz naeh mboq ruxndeq Bihdowh bae rawz, paenqdix mboq ruxndeq hoakzaqrawz hoak, huangz daengz mboq zawh haxnyaeux. ¹⁹Cizlih goanz hoak hongz naeh cha Bihdowh, gaj cha mboq taen, zoq jinj sowh bin dawz ndaw lauz naeh, nemz daenh kaj sowh bin dawz ndaw lauz naeh. Doaklaeng, Cizlih ni mbanj Yaeuhdaq, bae Kaixsaxliqyaq chaenh yuq dihnaeh ndowj.

Laux hongz Cizlih Goanz Naeh Zoah Dij Sen Kaj

²⁰Cizlih rikdwk dij goanz ndaw Taiq'ex chaenh dij dij goanz ndaw Cizdunq chaenh. Gaj song chaenh naeh baenz maz dij sowh dih Cizlih gvanx naeh swx kaeuj, song dih naeh zoq zaemh maz dih Cizlih naeh. Paenqdix zoq mwz vanz Boahlazswzdud laux saeq yuq baihdawj Cizlih naeh saeh, vanz laux saeq naeh vanz Cizlih dij paenqdix dungzndae. ²¹Vaenz Cizlih dij paenqdix dungztaen naeh, Cizlih nungh tauq sowj hongz dix, naengh aen daengq hongz dix, dij daengzle hax kauq. ²²Dij goanz dihnaeh biangz Cizlih, caqsiq hoakzaqnaeh rongx: "Hiang naeh zawh hiang dij Sen, mboq zawh hiang dij goanz!" ²³Gaj Cizlih mboq lanx gaemz rawz, longx najta dij Sen, bin dij Sen zoq cenq hawj dij noan yuq ndaw dongx dix jin nowx dix, hawj dix tai.

²⁴Kauqfaengz dij Sen gaj vaenz laeng gaj miz goanz lai ruxnyinz, gaj laeng gaj leuz bae gvae. ²⁵Baznahbaz dij Sauxloah aeu sowh ngaenzjenz aeu hawj dih baenzyaeg naeh hawj yaq, zoq zowz

Yezhanq goanz rongx hoak Maxkowh naeh daeq Yezluqsaxlaengx dauh bae Anztih'az chaenh.

Minghkoan Dij Sen Hawj Zauqhoiq Anztih'az Chaenh Nemz Bauxloah Daj Baznahbaz Bae Dih Bae Dih

13 ¹Zauqhoiq Anztih'az chaenh, miz jij goanz puj zawxkauq dij Sen ux dij miz jij goanz lauxswz ux, zoq zawh Baznahbaz, Cizmaenh goanz goj rongx hoak Nihjeh naeh,^s Luqchaeuh ndaw Guxliqnaiq, Maxnenj goanz dij laux hongz Cizlih zaemh yuq dihndeuh zowngx dwx naeh, yaq Sauxloah. ²Zwz paenqdix kvej Zaeuj, jenjkaeuj hoakri dij Zaeuj hax kauq naeh, Minghkoan dij Sen dij paenqdix hax: "Gux nemz Baznahbaz dij Sauxloah bae hoak gaenq gux yaix paenqdix hoak naeh. Baenzzaqnaeh su aeu Baznahbaz dij Sauxloah hoak dij puj ndai mboq dungzljumj, hawj paenqdix zoanzmaenh hoak sowh gaenq gux yaix paenqdix hoak naeh." ³Yaq paenqdix zoq jenjkaeuj hoakri dij dij Sen hax kauq, aeu mungz baed mwz now doiqdixvanz dij Sen gumx doiqdix, zoq nemz doiqdix bae. ⁴Minghkoan dij Sen nemz paenqdix loangzdin, bae Cizleuhjiz, daeq Cizleuhjiz naengh lowz bae Saiqpuxluqsez haixdaux. ⁵Paenqdix bae taeng Saxlazmix, zoq yuq ndaw le aen rownzndawcowq puj Yaeuhtaiq dih naeh aeu kauqfaengz dij Sen laemh dwk daenh. Yezhanq goanz goj rongx hoak Maxkowh naeh yuq baihdawj paenqdix, saeh paenqdix hoak raeng raeng. ⁶Paenqdix daeq daengz Saiqpuxluqsez nauq, doaklaeng bae taeng Paqfuh chaenh, yuq ndaw

^s13:1 "Nihjeh" zoq zawh hax "nowx ndaem," goanz naeh injg zawh dij goanz Faezzaeuz.

Paqfuh, paenqdix mex goanz ux rongx hoak Baz-yezsuzyaq,^t goanz naeh zawh puj Yaeuhtaiq, dix rux hoakbang, dix zawh puj zawxkauq dij Sen goanz zaj gaenqnaeh. ⁷ Goanz naeh kwnz daj puj saeq dwx goanz rongx hoak Seqchaeuh-bauxloah naeh zaemh yuq. Seqchaeuh-bauxloah zawh puj gvai, dix qingj Baznahbaz daj Sauxloah maz, daz biak paenqdix koanx kauq dij Sen. ⁸ Gaj Baz-yezsuzyaq dix kauq dij goanz zawxkauq Yezsuz, mboq zawx hawj goanz saeq dwx naeh sinq Zaeuj. Baz-yezsuzyaq goj rongx hoak Loixmax, Loixmax zoq zawh hax rux hoakbang. ⁹ Sauxloah, goanz goj rongx hoak Bauxloah naeh, Minghkoan dij Sen dumh daengz ndang dix, dix lez bae doq goanz hoakbang naeh daengz ta mboq yaep saw, ¹⁰ yaq hax: "Mawz ah, yaiz lug do pi dwx naeh, mawz goix tai goix naeuh, mbowq daengh taeuq, gaenqrawz hoj, mawz daj gaenqrawz hoak dangqbaih. Ka loh Zaeuj daeq ngaih ngez, gaj taeng gannaeh mawz naengz hawj ka loh Zaeuj daeq raix, hawj kauq dij Sen nyungj nauq. ¹¹ Gannaeh, mungz Zaeuj zaemj daeuj doq mawz, hawj mawz ta'mbud, hawj mawz lez mboq taen gaeng goanq." Baz-yezsuzyaq cenq lez mboq taen gaeng, lez mwz rawz goj ndaem zumhumh, dix lumhlamh haenzhenz, vanz daenh zung dix. ¹² Goanz saeq dwx naeh leztaen sowh saeh naeh yaq, zoq sinq Zaeuj. Dix mboq naemz sowh kauq Zaeuj zau naeh miz riangz baenzaqnaeh.

Bauxloah Yuq Mbanj Pihcizdix

¹³ Bauxloah daj dungzbownh naengh lowz daeq Paqfuh mwz ndaw mbanj Panghfaezliqyaq aen chaenh rongx hoakBehzaz naeh, gaj Yezhanq goanz goj rongx hoak Maxkowh naeh yuq ndaw Behzaz ni paenqdix dauh mwz Yezluqsaxlaengx. ¹⁴ Bauxloah daj Baznahbaz doiqdix daeuq daeq mwz baihnaj, mwz taeng ndaw mbanj Pihcizdix aen chaenh Anztih'az naeh. Vaenz Cednoiq, paenqdix mwz rownzndawcowq puj Yaeuhtaiq naengh. ¹⁵ Gau doag *Sw Dij Sen* naeh gah yaq, sowh puj gvanx rownzndawcowq naeh nemz dij goanz bae daj doiqdix hax: "Song laux bih aj, jixzawh su miz kauq dungzchownq dungzbyongz, su zoq hax ndeh." ¹⁶ Bauxloah dwnq maz, yaeuj mungz dix, hax: "Puj Yixsowhleh aj, sowh puj yowngh ndai ruxndeq mbu dij Sen naeh aj, gaenqsu biak gux hax. ¹⁷ Dij Sen puj Yixsowhleh lowg puj jeq rownz piu, zwz puj jeq rownz piu yuq ndaw Aizjih dex daenh ndowj naeh dij Sen hawj paenqdix raengh. Yaq dix aeu riangz dwx dix lingz paenqdix daeq Aizjih og daeuj. ¹⁸ Dij Sen yuq ndaw doanghmowz yinx paenqdix siqsip bi. ¹⁹ Doaklaeng dij Sen ndaep jiat yowngh dij goanz ndaw Zaznanh naeh yaq, aeu Zaznanh hawj paenqdix hoak dih yuq dih hoakjin. ²⁰ Daeq zwz puj Yixsowhleh bae Aizjih naeh yaq doaklaeng ni Aizjih maz taeng ndaw Zaznanh dih dij Sen aeu hawj paenqdix naeh daengzle ndaej teq siq baeg laeng hajsip bi ux naeh. Doaklaeng, dij Sen hawj paenqdix miz sowh puj saeq hoak

^t13:6 "Baz-Yezsuzyaq" zoq zawh hax: "Lug Yezsuzyaq." Yezsuzyaq zawh minxzwh dez goanz gaengnaeh, Loixmax zawh minxzwh dix. Lez ndaw Sw Ni Aizjih 11-12.

lauxgoak naeh, taengdeg zwz puj zawxkauq dij Sen Saxmuxex naeh zuxgah.²¹ Doaklaeng paenqdix vanz dij Sen saeh paenqdix lowg laux hongz ux. Dij Sen zoq hawj Sauxloah goanz lug zaiz Jizseq, goanz daeq ngah Benqyaqminh daeuj naeh hoak hongz paenqdix siqsip bi.²² Dij Sen hawj Sauxloah hoak gah yaq, dix lowg Daqvaeq hoak hongz paenqdix. Dij Sen hoakzaqnaeh hax Daqvaeq: ‘Gux cha ndaej goanz ux hojzaw gux, dix toj gaj loh gaj tw'zaw gux, dix zoq zawh Daqvaeq goanz lug zaiz Yezciz naeh.’^{u*} ²³ Dij Sen hoakzaq dix ndaej yinq naeh, lowg luglan goanz naeh goanz ux jeuq dij goanz Yixsowhle. Goanz naeh zoq zawh Yezsuz.²⁴ Zwz Yezsuz naengzbaeq daeuj dih Yezhanq naeh, Yezhanq haeuz koanx dwk dij goanz Yixsowhle, haxdoq daenh hoak loang yauq rux gaix, hoak diauq zauh soiq naeh.²⁵ Zwz Yezhanq zaekgaj hoak nauq najgaengx dix naeh, dix hax: ‘Gaenqsu faeklaih gux zawh gawz mux? Gux mboq zawh Jizduz. Jizduz daeuj doaklaeng gux, gux daengz saeh dix hih sai'haiz naengz mboq paeq.’²⁶ Bauxloah daeuq hax: “Bihnongx aj, luglan Yaqboahlazhanq aj, sowh puj yowngh ndai ruxndeq mbu dij Sen naeh aj, sowh kauq hawj dij goanz ndaej jeuq naeh zawh leuz daeuj hawj raeuz.²⁷ Gaj sowh dij goanz yuq ndaw Yezluqsaxlaengx ndowj naeh daj puj saeq paenqdix mboq ruxndeq Yezsuz zawh Jizduz. Paenqdix Vaenz Cednoiq rawz goj doag le bwnz sw puj zawxkauq dij Sen naeh, gaj paenqdix naengz mboq ruxndeq,

naengz gajfa hax Yezsuz hoj tai. Paenqdix hax Yezsuz hoj tai, paenqdix zoq hawj sowh kauq puj zawxkauq dij Sen hax naeh baenzaeh.²⁸ Paenqdix cha mboq taen saek yowngh hoj hawj Yezsuz tai, gaj paenqdix naengz vanz Bihlazdoz kaj dix.²⁹ Sowh kauq ndaw *Sw dij Sen* mai hax dix rux zoah tai naeh baenzaeh yaq, paenqdix zoq aeu dix daeq zaq maex daeuj, nyaengx bae ndaw mohbujreuh.³⁰ Gaj dij Sen hawj dix tai yaq daeuq zaeu.³¹ Ndauj doaklaeng naeh, sowh puj daj dix daeq mbanj Zazliqliq mwz ndaw Yezluqsaxlaengx naeh ndaej taen dix. Paenqdix ndaej taen dix daeuq zaeu, paenqdix bae haxdoq dij goanz Yixsowhle piu.³² Gannaeh gaenqpiu haxdoq su gaenq ux faengz taeuq, zoq zawh sowh gaenq dij Sen yinq puj jeq rownz piu naeh,³³ dij Sen haeuz hawj yuq zoh zawjraeuz baenzaeh, hawj Yezsuz tai yaq daeuq zaeu. Daj *Sw Lownx* zangz daih ngih hax naeh dungz lumj: ‘Mawz zawh lug zaiz gux, vaenz naeh gux rungj mawz.’³⁴ Hax taeng mbaed saeh dij Sen hawj Yezsuz tai yaq daeuq zaeu, zaeu daengznauq naeh, dix hoakzaqnaeh daj puj Yixsowhle hax: ‘Gux aeu gaenq gux yinq hawj Daqvaeq, sowh gaenq sawrik, maengx ndaej naeh hawj su.’^v ³⁵ *Sw Lownx* naengz miz zangz ux hax: ‘Mawz toj mboq rux hawj ndang dij goanz mawz goanz sawrik naeh naeuh.’^w ³⁶ Daqvaeq daengz zohgoanz biak kauq dij Sen, doaklaeng tai yaq, mwz daj puj jeq rownz dix zaemh yuq, nowx dix goj naeuh.³⁷ Mizgaj goanz

^u13:22 Gaemz kauq naeh haeuz yuq Sw Saxmuxex Bwnz Daih Aet Naeh 13:14.

^v13:34 Gaemz kauq naeh haeuz yuq Sw Yixsaiqyaq 55:3.

^w13:35 Gaemz kauq naeh haeuz yuq Sw Lownx 16:10.

*13:22 Lownx 89:20; Yixsaiqyaq 44:28.

dij Sen hawj daeuq zaeu naeh mboq taen nowx dix naeuh. ³⁸ Baenzaqnaeh bihnongx aj, gaenqsu hoj ruxndeq: Mizgaj maengx Jizduz, gaenq hoakloang su zux ndaej yangq. ³⁹ Mboq miz gawz maengx biak fahliah Moahciz rux hawj hoakri byenqbaenz sowh goanz gaemz hax mboq miz naeh baenz, mizgaj maengx Jizduz zux ndaej hoak sowh goanz gaemz hax mboq miz naeh baenz. ⁴⁰ Baenzaqnaeh gaenqsu yauq caqsiq hem, yaj sowh kauq puj zawxkauq dij Sen hax naeh yuq ndaw ndang su baenzaeh. ⁴¹ Pujzawxkauq dij Sen ndaej hoakzaqnaeh hax:

"Sowh puj lezmboqix dij Sen naeh aj,
gaenqsu caqsiq jem, gaenqsu toj sawz taeuq
mboqyaq, gaenqsu toj lown.
Unj jeh su naeh, gux hoak mbaed saeh ux,
daengz miz dij goanz haxdoq su, su goj
mboq sinq."^x

⁴² Gau Bauxloah daj Baznahbaz ni rownzndawcowq naeh, dij goanz rownzndawcowq vanz doiqdix Vaenz Cednoiq mawq daeuq maz koanx kauqfaengz dij Sen hawj paenqdix biak. ⁴³ Dungzbyaeg rownzndawcowq yaq, miz puj Yaeuhtaiq lai taeuq daj sowh puj yowngh ndai sinq Yaeuhtaiq zauq naeh sowh puj nowngz dij Sen haen laez haen lih naeh nowngzlaeng Bauxloah daj Baznahbaz. Doiqdix daj paenqdix laemh kauq, saengq paenqdix yauq caqsiq yuq dawj sowh gaenq dij Sen yumq doiq dij goanz ndae naeh mwznaj. ⁴⁴ Daeuq taeng Vaenz Cednoiq naeh, damz daengz

chaenh dij goanz maz rownzndawcowq nauq, biak paenqdix koanx kauqfaengz dij Sen. ⁴⁵ Puj Yaeuhtaiq leztaen miz dij goanz lai baenzaqnaeh maz zaemh yuq, ta'ndaem doiqdix taeuq. Paenqdix hoakrawz gojmbaeuq, dix kauq Bauxloah, moakndai Bauxloah. ⁴⁶ Bauxloah daj Baznahbaz ngoah taeuq, paenqdix hax: "Kauqfaengz dij Sen mbaednduq hoj koanx dwk puj Yaeuhtaiq daekgoanq, gaj su mboq zaemz, haeggaj aeu hoakri hoak sowh puj mboq paeq ndaej aen mingh daengznauq naeh. Baenzaqnaeh mbaenqnaeh gaenqpiu aeu kauqfaengz dij Sen bae koanx dwk puj yowngh ndai yah. ⁴⁷ Daengz Zaeuj goj haeggaj ndaej hoakzaqnaeh nemz piu: 'Gux haeuz lowg mawz, hawj mawz hoak aen daeng lingz puj yowngh ndai, hawj mawz bae koanxdwk paenqdix hoakrawz ndaej jeuq, koanx bae daengz dawj fax nauq.'^y"

⁴⁸ Puj yowngh ndai ruxnyinz gaemz naeh zoq faengz taeuq, zaemz kauq Zaeuj. Nanghgaj sowh puj dij Sen lowg zoah hawj ndaej aen mingh daengznauq naeh, daengzle sinq Zaeuj nauq. ⁴⁹ Yaq kauq Zaeuj zoq leuz mbanj naeh nauq. ⁵⁰ Gaj puj Yaeuhtaiq coak sowh puj yuq chaenh naeh sowh puj miz najta naeh, daj coak sowh mehrownz baenzsaq nowngz dij Sen haen laez haen lih naeh, coak paenqdix hwnq Bauxloah. Paenqdix coak daenh bih Bauxloah daj Baznahbaz, daem paenqdix ni mbanj paenqdix. ⁵¹ Doiqdix yuq doqnaj daengzle chaeuq mowdmoanz ndaw din paenqdix ni, zoq mwz Yixgoznenj. ⁵² Cohsaenz Yezsuz ndaw zaw faengz

^x13:41 Suq kauq nach haeuz yuq Sw Hazbazguh 1:5.

^y13:47 Gaemz kauq nach haeuz yuq Sw Yixsaiqyaq 49:6.

taeuq, miz Minghkoan dij Sen dumh daengz ndang paenqdix.

Bauxloah Daj Baznahbaz Yuq

Ndaw Yixgoznenj Chaenh

14¹Bauxloah daj Baznahbaz bae taeng Yixgoznenj chaenh, paenqdix zaemh bae rownzndawcowq puj Yaeuhtaiq koanx kauqfaengz dij Sen dwk daenh. Hoakzaqnaeh miz puj Yaeuhtaiq daj puj yowngh ndai^z lai taeuq sinq Yezsuz. ²Gaj puj Yaeuhtaiq sowh puj mboq sinq, mboq biak Yezsuz naeh coak puj yowngh ndai hwnq cohsaenz Yezsuz. ³Doiqdix yuq dih naeh ndowj ndauj ux, paenqdix maengx Zaeuj, ngoah taeuq, koanx kauq dij Sen. Zaeuj aeu mungz paenqdix hoak sowh saenh yaengh saenh naeh, hawj daenh ruxndeq diauq dij Sen yumq doiq dij goanz ndae naeh zawh zaeh. ⁴Dij goanz ndaw chaenh byaeg baenz song boangx, mbangj goanz nowngz puj Yaeuhtaiq, mbangj goanz nowngz dij goanz zawxkauq Yezsuz. ⁵Zwz naeh, sowh puj mboq sinq naeh, miz puj Yaeuhtaiq daj puj yowngh ndai, yaq puj saeq paenqdix, daengzle tomj maz, daz hawj dij goanz zawxkauq Yezsuz laizlom najyaij, daz aeu tin saeuh paenqdix tai. ⁶Bauxloah daj Baznahbaz ruxndeq yaq, zoq gowx mwz mbanj Loixgauznih, zoq zawh mwz Luqsezdowh chaenh, Towhbiq chaenh daj haenzhenz le dih naeh, ⁷yuq le dih naeh koanx kauqfaengz dij Sen dwk daenh.

Yuq Ndaw Luqsezdowh

⁸Ndaw Luqsezdowh chaenh miz goanz ux song ka mboq miz doakriangz, swm daeuj zoq bwnz baenzgvez, naengz mboq sanz rux daeq. ⁹Dix biak Bauxloah koanx kauqfaengz dij Sen. Bauxloah caqsiq lez dix, leztaen dix sinq Zaeuj rux jeuq dix, ¹⁰Bauxloah zoq caqsiq daj dix hax: "Dwnq maz, song ka in swH!" Goanz gaengnaeh yoanghyangh dwnq maz, daeq loh. ¹¹Goanzlai leztaen sowh saeh Bauxloah hoak naeh, zoq aeu kauq mbanj Loixgauznih hax: "Miz dij sen byenqbaenz dij goanz loangz daeuj zawjraeuz yah!" ¹²Yaq paenqdix zoq rongx Baznahbaz hoak Zaeuqsez, laux sen dwx paenqdix naeh. Damz zawh Bauxloah daj goanzlai hax kauq, paenqdix zoq rongx Bauxloah hoak Cizexmix, laux zawxkauq Zaeuqsez naeh. ¹³Haenz chaenh miz aen meuh Zaeuqsez ux. Goanz mbud Zaeuqsez naeh zoq zung dij moaz, tw goangh ndog'va maz baeglongq, daz daj goanzlai zaemh mbud doiq naeh. ¹⁴Baznahbaz daj Bauxloah song goanz zawxkauq Yezsuz naeh ruxnyinz, zoq riag sowj hoakri,^a lenh bae jeh daengzle, caqsiq rongx: ¹⁵"Daengzle aj, gaenqsu baenzaqrawz hoakzaqnaeh mux? Gaenqpiu goj zawh dij goanz, goj daj su dungzlumj. Gaenqpiu maz inxnaeh koanx kauqfaengz dij Sen dwk su, yaix su ni sowh gaenq mboq miz gaeng luq naeh, dauh maz doq dij Sen jing, dij Sen miz daengznauq, dij Sen chauq fax, dihndin, haij daj daengzle sowh gaenq yuq ndaw paenqdix naeh. ¹⁶Koax daekgoanq zoh

^z14:1 Inxnaeh ndaw sw hax: *puj Cizlah*. Inxnaeh *puj Cizlah* zoq zawh hax sowh dij goanz mboq zawh puj Yaeuhtaiq naeh.

^a14:14 Paenqdix riag sowj hoakri zawh hax paenqdix hax goanzlai hoakzaqnaeh hoak loang dwx, paenqdix yuqyaix taeuq.

rawz gojvenj, dij Sen jizzaz puj yowngh ndai su ngaiq hoakrawz zoq hoakrawz. ¹⁷ Gajlej dix naengz zwzzwz aeu yowngh aeu yowngh, hoak saeh ndae hawj dij goanz ruxndeq miz dix zaeh, hawj paen daeq ndaw fax daeuj, hawj kaeujpyaek yawz, hawj su jin imqdwngq, hawj zaw su yuqzaih." ¹⁸ Song goanz dix hax suq kauq naeh yaq, zux daeg daeg lanx ndaej gaj goanzlai mboq mbud doiqdix.

¹⁹ Gaj miz puj Yaeuhtaiq daeq Anztih'az chaenh daj Yixgoznenj chaenh maz, coak goanzlai. Paenqdix zoq aeu tin saeuh Bauxloah, faeklah dix tai yaq, laeg dix bae haenz chaenh. ²⁰ Gau cohsaenz Yezsuz tomj haenz dix naeh, dix dwnq maz, daeq mwz ndaw chaenh. Vaenzlaeng dix daj Baznahbaz mwz ndaw Towhbiq chaenh.

Bauxloah Daj Baznahbaz Dauh Maz Anztih'az

²¹ Paenqdix yuq dih naeh aeu kauqfaengz dij Sen koanx dwk daenh, miz dij goanz lai taeuq sinq Yezsuz, hoak cohsaenz Yezsuz. Yaq paenqdix daeuq dauh maz Luqsezdowh chaenh, Yixgoznenj chaenh, Anztih'az chaenh, ²² hawj cohsaenz Yezsuz kaem'zaw daeq ka loh dij Sen, zau paenqdix kaemjzaw sinq taeng mowd, goj daj paenqdix hax: "Gaenqraeuz sowh puj daeq ka loh goh dij Sen naeh, rux ndaej jinkaem lai taeuq." ²³ Bauxloah daj Baznahbaz bae aen zauqhoiq rawz goj saeh zauqhoiq lowg sowh puj gvanx dij goanz zauqhoiq naeh. Daengzle jenjkaeuj hoakri vanz dij Sen yaq, doiqdix zoq vanz Zaeuj paenqdix maengx naeh zauzhuz paenqdix.

²⁴ Doiqdix gvaq zoah mbanj Pihcizdix, maz taeng mbanj Panghfaezliqyaq. ²⁵ Yuq ndaw mbanj

Panghfaezliqyaq aen chaenh rongx hoak Behzaz naeh aeu kauqfaengz dij Sen koanx dwk daenh, zoq bae mbanj Yaqdaqliq. ²⁶ Yuq ndaw Yaqdaqliq naengh lowz dauh maz Anztih'az chaenh. Anztih'az chaenh zoq zawh dih koax daekgoanq dij goanz zauqhoiq aeu doiqdix nyaengx mwz ndaw mungz dij Sen, vanz dij Sen yumq saeh doiqdix hoak sowh gaeng doiqdix hiamq hoak ndae naeh. ²⁷ Doiqdix maz taeng Anztih'az yaq, rongx dij goanz zauqhoiq maz, haxdoq daengzle, dij Sen aeu doiqdix bae hoak gaeng raeuh, dij Sen hoakrawz aj ka loh hawj puj yowngh ndai goj sinq Zaeuj baenz. ²⁸ Doiqdix yuq dihnaeh daj cohsaenz Yezsuz zaemh ndowj yaengh ndauj.

Yuq Ndaw Yezluqsaxlaengx Dwkgangz

15 ¹ Miz jij goanz ux daeq mbanj Yaeuhdaq daeuj. Paenqdix hoakzaqnaeh zau bihnongx zauqhoiq: "Jixzawh gaenqsu mboq hoakzaq fahliah Moahciz hax naeh, hoak diauq zauh heh naeh, gaenqsu zoq mboq ndaej jeuq." ² Bauxloah, Baznahbaz daj paenqdix laemh bae laemh dauh, dungzjinj jinx taeuq. Doaklaeng daengzle zoq nemz Bauxloah, Baznahbaz daj zauqhoiq dih naeh jij goanz ux, nemz paenqdix mwz Yezluqsaxlaengx daj dij goanz zawxkauq Yezsuz, yaq sowh puj gvanx dij goanz zauqhoiq naeh dungzcham mbaed saeh naeh. ³ Dij goanz zauqhoiq dihnaeh zoq soangq le Bauxloah loangzdin. Le Bauxloah zoq gvaq mwz mbanj Faeznihjiz, mbanj Saxmaxliqyaq, haxdoq daenh puj yowngh ndai goj sinq Zaeuj. Bihnonxg zauqhoiq daengzle zaemz taeuq. ⁴ Le Bauxloah mwz taeng

Yezluqsaxlaengx, dij goanz zauqhoiq, yaq dij goanz zawxkauq Yezsuz, yaq sowh puj gvanx dij goanz zauqhoiq naeh daeuj raep paenqdix. Le Bauxloah haxdoq daengzle dij Sen daj paenqdix hoak gaeng raeuh. ⁵ Gaj sowh puj sinq Zaeuj naeh, miz jij goanz puj Fahliqsaiq ux dwnq maz hax: "Saeh puj yowngh ndai sowh puj hoak cohsaenz Yezsuz hoak diauq zauh heh naeh, nemz paenqdix biak fahliah Moahciz zuxbaenz." ⁶ Dij goanz zawxkauq Yezsuz daj sowh puj gvanx dij goanz zauqhoiq naeh maz zaemh yuq dungzcham mbaed saeh naeh. ⁷ Laemh bae laemh dauh yaq, Bihdowh dwnq maz hax: "Daengzle, gaenqsu ruxndeq, boangx raeuz naeh, dij Sen haeuz bwnz lowg gux, hawj puj yowngh ndai daeq baeg gux ruxnyinz kauqfaengz dij Sen, hawj paenqdix ndaej sinq Zaeuj. ⁸ Dij Sen laux ruxndeq ndaw zaw dij goanz naeh, dix aeu minghkoan dix hawj paenqdix, daj koax daekgoanq aeu hawj raeuz naeh dungzlumj, hawj dij goanz ruxndeq dix goj aeu puj yowngh ndai hoak dij goanz dix. ⁹ Gawz sinq dij Sen, dij Sen zoq hawj gawz saw, dix doiq paenqdix daj doiq gaenqraeuz mboq miz gaeng mboq dungzlumj. ¹⁰ Gannaeh gaenqsu baenzaqrawz daeg dij Sen, baenzaqrawz aeu sowh taeb puj jeq rownz raeuz daj raeuz tw mboq ndaej naeh gaemh mwz rongzmbaq cohsaenz Yezsuz mux? ¹¹ Mboq zawh hoakzaqnaeh gah. Diauq gaenqraeuz sinq naeh zoq zawh gaenqraeuz goj daj paenqdix dungzlumj ndaej jeuq zawh cho'mbaiq Zaeuj raeuz Yezsuz, zawh cholaeng dix yumq doiq raeuz ndae."

¹² Daengzle byaekrik, mboq goak gaemz rawz, biak Baznahbaz daj Bauxloah laemh sowh saenh

yaengh saenh dij Sen aeu paenqdix bae jeh puj yowngh ndai hoak naeh. ¹³ Doiqdix hax gah, Yaqgowh zoq dwnq maz hax: "Daengzle bihnongx aj, biak gux hax jij gaemz ux. ¹⁴ Gaundiq Cizmaenh laemh baez nduq dij Sen hoakzaqrawz daeuj zauzhuz puj yowngh ndai, dij Sen lowg paenqdix hoak dij goanz dix. ¹⁵ Daj zwzpujjeq puj zawxkauq dij Sen hax naeh dungzlumj. ¹⁶ Ndaw *Sw Dij Sen* hoakzaqnaeh laiz:

"Dij Sen hax: 'Gvaq le gaenqnaeh yaq, gux daeuq dauh daeuj,
Aen zangipungh Daqvaeq haeuz laemx yaq,
gux daeuq daengj dix, daeuq zoih dix.

¹⁷ Hoakzaqnaeh hawj puj ndai,
zoq zawh hawj sowh puj yowngh ndai yuq
dauj zwh gux naeh, daengzle ruxndeq ceu
Zaeuj, cha Zaeuj.

¹⁸ Gaenqnaeh zawh dij Sen hax, daeq zwzndowj
maz dix haeuz bwnz hawj dij goanz
ruxndeq.'*

¹⁹ Baenzaqnaeh gux nwh maz, raeuz mboq baenz hawj puj yowngh ndai sowh puj hoak cohsaenz Yezsuz naeh hoakraix. ²⁰ Gajlej laiz cing hawj paenqdix, saengq paenqdix mboq jinx jin sowh gaenq aeu mbud dij sen zaj naeh, puj nyingz daj puj zaiz mboq zawh po'mez mboq jinx zaemh noanz, mboq jinx jin lowd, mboq jinx jin sowh doihdo jenjhoz tai naeh. ²¹ Unj, daeq zwz puj jeq maz, longq rawz goj miz dij goanz doag sw Moahciz laiz naeh,

*15:18 Azmoahswz 9:11-12.

Vaenz Cednoiq, rownzndawcowq rawz goj miz dij goanz doag hawj daengzle biak."

Dwkgangz Hoakzawrawz Hoak

²² Zwz naeh, dij goanz zawwkauq Yezsuz, sowh puj gvanx dij goanz zauqhoiq naeh, daj daengz dij goanz zauqhoiq nauq zoahdowh hoj, paenqdix zoq lowg song goanz daj Bauxloah, Baznahbaz zaemh bae Anztih'az. Song goanz paenqdix lowg naeh zawh sowh puj gvanx dij goanz zauqhoiq naeh. Song goanz naeh miz goanz ux rongx hoak Yaeuhdaq, miz goanz ux rongx hoak Cizlaz. Goanz rongx hoak Yaeuhdaq naeh goj rongx hoak Bazsaxbaz. ²³ Paenqdix laiz cing hawj paenqdix tw bae, ndaw fungcing naeh hoakzaqnaeh laiz: "Gaenqpiu zawh dij goanz zawwkauq Yezsuz daj sowh puj gvanx dij goanz zauqhoiq naeh, gaenqpiu laiz cing hawj gaenqsu paenq bihnongx puj yowngh ndai yuq ndaw Anztih'az, Ciqliqyaq, Jizliqzaz naeh. Gaenqsu yuqndae naeujobjleh? ²⁴ Gaenqpiu ruxnyinz, miz jij goanz ux daeq zawj piu og bae, bae zawj su yaix su hoak diauq zauh heh naeh daj biak fahlih Moahciz, hawj gaenqsu yuq mboq vangq. Gaj gaenq naeh mboq zawh piu yaix paenqdix hoak. ²⁵ Baenzaqnaeh, gaenqpiu daengzle zawh zawdoag. Gaenqpiu lowg jij goanz ux, hawj paenqdix daj Baznahbaz, Bauxloah doiq gaenqpiu nwh taeuq naeh bae dih su. ²⁶ Doiqdix cholaeng zwh Zaeuj raeuz Yezsuz Jizduz daengz aen mingh naengz mboq aeu saw. ²⁷ Gaenqpiu nemz Yaeuhdaq daj Cizlaz daj paenqdix zaemh bae, hawj paenqdix baeg ndiang daj su hax le gaenq naeh. ²⁸ Minghkoan

dij Sen daj gaenqpiu mboq rux aeu taeb naek yowngh ndai nyaengx mwz rongzmbaq su, gaj miz jij yowngh ux su hem zuxbaenz, ²⁹ zoq zawh mboq jinx jin sowh gaenqjin aeu mbud dij sen zaj naeh, mboq jinx jin lowd, mboq jinx jin sowh doihto jenjhoz tai naeh, puj nyingz daj puj zaiz mboq zawh po'mez mboq jinx zaemh noanz. Le gaenqnaeh su laek hoak zoq baenz ej. Ngwz gaenqsu yuqndae!" ³⁰ Siq goanz nemz bae naeh, bae taeng Anztih'az, paenqdix rongx daengzle cohsaenz Yezsuz maz, aeu cing hawj paenqdix. ³¹ Daengzle doag yaq, gaj goanz gaj faengz laeng sowh kauq ndaw cing byongz paenqdix naeh. ³² Yaeuhdaq daj Cizlaz goj zawh puj zawwkauq dij Sen, hax lai taeuq byongz cohsaenz Yezsuz, hawj paenqdix kaem'zaw daeq ka loh dij Sen mwznaj. ³³ Doiqnaeh yuq ndaw Anztih'az ndowj ndauj ux yaq, doiqnaeh zoq dauh mwz Yezluqsaxlaengx, bihnongx dihnaeh zoq bae soangq loh paenqdix, doiqdix zoq dauh mwz vangqdangh. ³⁴ ³⁵ Gaj Bauxloah daj Baznahbaz naengz gaj yuq ndaw Anztih'az ndowj, doiqdix daj puj ndai lai taeuq zaemh zau daenh, koanx kauqfaengz dij Sen dwk daenh.

Bauxloah Daj Baznahbaz Goanz Ux Bae Dih Ux

³⁶ Gvaq ndaej ndauj ux, Bauxloah daj Baznahbaz hax: "Gaenqraez daeuq dauh bae le aen chaenh koax daekgoanq raeuz aeu kauqfaengz dij Sen laemh dwk daenh naeh, bae lez cohsaenz Yezsuz ndauj zawjraez baenzaqrawz." ³⁷ Baznahbaz zawh hawj Yezhanq goanz goj rongx hoak Maxkowh naeh zaemh bae. ³⁸ Gaj Bauxloah hax mboq

^{b15:34} Mbangj bwnz miz gaemz naeh: *Gaj Cizlaz yuq ndaw Anztihlaz, mboq dauh mwz Yezluqsaxlaengx.*

baenz zowz Maxkowh zaemh bae. Unj koax daekgoanq Maxkowh yuq ndaw Panghfaezliqyaq ni paenqdix, mboq daj paenqdix zaemh hoak taeng mowd. ³⁹Doiqdix dungzjinj, daengz dungzbyaeg saw. Baznahbaz daj Maxkowh, naengh lowz bae Saiqpuxluqsez haixdaux. ⁴⁰Bauxloah lowg Cizlaz, goj loangzdin. Cohsaenz Yezsuz daengzle aeu dix nyaengx mwz ndaw mungz Zaeuj, vanz Zaeuj yumq saeh dix hawj dix hoak najgaengx dij Sen baenz ndaej. ⁴¹Bauxloah daeq daengz mbanj Ciqliqyaq, mbanj Jizliqzaz nauq, hawj dij goanz le aen zauqhoiq naeh kaem'zaw daeq ka loh dij Sen mwznaj.

Bauxloah Zowz Tihmoaxtaiq Zaemh Bae

16 ¹Bauxloah maz taeng Towhbiq chaenh, daeuq bae taeng Luqsezdowh chaenh. Yuq ndaw Luqsezdowh miz goanz cohsaenz Yezsuz ux, minxzw h rongx hoak Tihmoaxtaiq. Goanz naeh meh dix zawh puj Yaeuhtaiq, sinq Zaeuj, gaj dez dix zawh dij goanz Cizlah. ²Bihongx sowh puj yuq ndaw Luqsezdowh daj Yixgoznenj naeh daengzle haenh Tihmoaxtaiq taeuq. ³Bauxloah daz zowz Tihmoaxtaiq bae koanx kauqfaengz dij Sen. Gaj puj Yaeuhtaiq dihnaeh gaj goanz gaj ruxndeq dez Tihmoaxtaiq zawh dij goanz Cizlah, cholaeng hawj puj Yaeuhtaiq venq biak sowh gaenq Tihmoaxtaiq koanx naeh, Bauxloah zoq saeh Tihmoaxtaiq hoak diauq zauh heh naeh. ⁴Paenqdix bae longq bae longq koanx kauqfaengz dij Sen, bae taeng rawz zoq yaix daenh biak sowh gaenq dij goanz zawxkauq Yezsuz daj sowh puj gvanx dij goanz zauqhoiq yuq ndaw Yezluqsaxlaengx nemz naeh. ⁵Hoakzaqnaeh

aen zauqhoiq rawz goj gaj laeng gaj sinq vwnxcih, dij goanz gaj vaenz laeng gaj miz lai.

Dij Sen Hawj Bauxloah Daj Paen'hwnz

Dungzlumj Taen, Hawj Dix

Bae Mbanj Maxqihdunq

⁶Minghkoan dij Sen daet paenqdix, mboq hawj paenqdix gannaeh yuq mbanj Yaqciqyaq koanx kauqfaengz dij Sen, paenqdix zoq gvaq koax mbanj Fuhloixzaz, mbanj Zazlaztaiq naeh. ⁷Paenqdix maz taeng haenz mbanj Maexcizyaq, daz ndonj mwz ndaw mbanj Biqtoiznih, gaj Minghkoan Yezsuz mboq jinx paenqdix mwz. ⁸Paenqdix zoq gvaq Maexcizyaq, bae taeng Towhloahyaq chaenh. ⁹Haemh gaengnaeh, dij Sen hawj Bauxloah daj paen'hwnz dungzlumj, leztaen miz goanz mbanj Maxqihdunq ux in vanz dix: "Vanz mawz daeuq Maxqihdunq saeh piu." ¹⁰Bauxloah leztaen gaenq dij Sen hawj dix paen'hwnz taen naeh, gaenqpiu zoq ruxndeq dij Sen rongx piu bae Maxqihdunq aeu kauqfaengz dij Sen koanx dwk daenh, gaenqpiu zoq cenq daz bae dih naeh.

Loixdixyaq Sinq Zaeuj

¹¹Gaenqpiu naengh lowz daeq ndaw Towhloahyaq bae taengdeg Saxmoahtowhlaz, vaenzlaeng bae taeng Nihyaqpozlix. ¹²Gaenqpiu daeq dihnaeh bae taeng Faezlihbiq chaenh. Faezlihbiq chaenh zawh dij goanz Loahmax daengj, Faezlihbiq yuq ndaw mbanj Maxqihdunq zawh aen chaenh dwx ux. Gaenqpiu yuq dih naeh ndowj jij vaenz ux. ¹³Vaenz Cednoiq, gaenqpiu ni ndaw chaenh bae haenz dah, piu nwh maz, dih naeh ingj miz saek dih zawh dih daj

dij Sen hax kauq. Dih naeh miz mehrownz zaemh yuq biangz dij Sen, gaenqpiu zoq naengh daeuj koanx kauqfaengz dij Sen dwk paenqdix. ¹⁴ Miz yah mehrownz ux minxzw h rongx hoak Loixdixyaq, dix zawh dij goanz ndaw Toizyaxtoizlaz chaenh. Goanz nyingz naeh zawh puj hoak gax, dix kai paeng zaemq. Dix mboq zawh puj Yaeuhtaiq gaj dix ruxndeq mbu dij Sen. Zaeuj lingz dix, hawj dix caqsiq biak sowh kauq Bauxloah koanx naeh. ¹⁵ Dix daj rownz dix hoak diauq zauh soiq naeh yaq, zoq hoakzaqnaeh vanz gaenqpiu: "Jixzawh gaenqsu hax gux zawh sinq Zaeuj zaeh, gaenqsu zoq maz rownz gux ndowj." Yaq dix zoq lanx piu yuq rownz dix ndowj.

Bauxloah Yuq Ndaw

Faezlihbih Zoah Mwz Kaeng Lauz

¹⁶ Miz mbaed ux, gaenqpiu bae haenz dah dih daj dij Sen hax kauq naeh, miz goanz puj koj nyingz ux daeq maz doq piu. Goanz nyingz naeh ndaw ndang dix miz dij pi, dij pi hawj dix rux yaengjmyoaz, dix yaengjmyoaz hawj le zaeuj dix ndaej lih lai taeuq. ¹⁷ Dix nowngzlaeng Bauxloah daj gaenqpiu, caqsiq rongx: "Le goanz naeh zawh puj koj dij Sen, zawh puj koj laux Sen dwx nyeuz daengzle naeh, koanx dij Sen hoakrawz jeuq dij goanz dwk su." ¹⁸ Dungzdam jijgaj vaenz hoakzaqnaeh rongx, Bauxloah lez wngq gvaq, ueqlaeng bae daj do pi naeh hax: "Gux aeu zw h Yezsuz Jizduz, yaix mawz daeq ndaw ndang goanz naeh og daeuj!" Do pi gaengnaeh cenq og daeuj. ¹⁹ Le zaeuj goanz puj koj nyingz naeh ruxndeq mbaedmawq maengx goanz puj koj nyingz naeh cha jenz mboq baenz,

zoq jenj Bauxloah daj Cizlaz, laeg paenqdix mwz hangzhw dih puj saeq naeh. ²⁰ Gau zowz mwz taeng doqnaj puj saeq dwx naeh, paenqdix hax: "Paenqdix zawh puj Yaeuhtaiq, paenqdix maz ndaw chaenh raeuz coak daenh, ²¹ koanx sowh gaeng dij goanz Loahmax raeuz mboq jinx sinq, mboq jinx nowngz naeh." ²² Daengzle zoq zaemh maz saeuh paenqdix, puj saeq dwx tod sowj paenqdix, nemz sowh puj baihdawj dix naeh aeu maex saeuh paenqdix, ²³ aeu maex saeuh lai mbaed taeuq, yaq aeu paenqdix kaeng mwz ndaw lauz, puj saeq dwx nemz puj dawzdu dawz naeuz ndae ux. ²⁴ Pujdawzdu biak puj saeq dwx hoakzaq naeh hax yaq, zoq aeu paenqdix kaeng mwz ndaw lauz gowh ndaw nyeuz daengzle naeh, aeu song kvaix maex gaeb ka paenqdix, yaq aeu tiksaed lamh.

Goanz Gvanx Ndaw Lauz

Naeh Daengz Rownz Dix Sinq Zaeuj

²⁵ Teq byonghhwnz ux naeh, Bauxloah daj Cizlaz daj dij Sen hax kauq, lownx biangz dij Sen. Pujkaenglauz ndai goj caqsiq biak. ²⁶ Hubhaeb miz mbaed diqzaeng ux dwx taeuq, daengz dinsaeu aen lauz fenz nauq, baegdu ndaw lauz daengzle aj nauq, daengz sowh tiksaed puk puj kaenglauz naeh goj lud nauq. ²⁷ Goanz gvanx ndaw lauz naeh daeh ruxndownq, leztaen baegdu ndaw lauz aj nauq, faeklahi puj kaenglauz lenh ni nauq, zoq it remz daz haeggaj kaj hoakri tai. ²⁸ Bauxloah caqsiq rongx goanz naeh: "Laek haiq hoakri, gaenqpiu daengzle yuq inxnaeh." ²⁹ Goanz gvanx ndaw lauz naeh cenq nemz dij goanz aeu daeng maz. Yaq dix lenh mwz ndaw lauz, saeng raeuhraeuh gvih

bae doqnaj Bauxloah daj Cizlaz. ³⁰Dix zowz doiqdix og daeuj yaq, cham doiqdix: "Lauxswz, gaenqgux hoakzawz hoak zux ndaej jeuq mux?"

³¹Paenqdix hax: "Sinq Zaeuj, Yezsuz, mawz daj rownz mawz zoq ndaej jeuq mboqyaq." ³²Yaq Bauxloah daj Cizlaz zoq aeu kauq Zaeuj laemh dwk goanz gvanx ndaw lauz naeh daj daengz rownz dix.

³³Hwnz gaengnaeh, goanz gvanx ndaw lauz naeh lingz paenqdix og bae, saeh paenqdix sauz dihchaej. Dix daj daengz rownz dix cenq hoak diauq zauh soi q naeh. ³⁴Dix qingj song goanz naeh mwz rownz dix, zawx kaeuj hawj paenqdix jin. Dix daj daengz rownz dix, cholaeng gannaeh sinq dij Sen, ndaw zaw gaj goanz gaj faengz taeuq.

³⁵Taeng nawlaeng faxrungh maz, puj saeq dwx nemz bin maz daj goanz gvanx ndaw lauz naeh hax: "Zoangq song goanz gaengnaeh ndeh." ³⁶Goanz gvanx ndaw lauz naeh daj Bauxloah hax: "Puj saeq dwx nemz dij goanz daeuj zoangq su, gannaeh su og

ndaw lauz bae vangqdangh eh." ³⁷Gaj Bauxloah daj paenqdix hax: "Piu suhyih dij goanz Loahmax, su hoj doiq piu daj doiq dij goanz Loahmax dungz lumj. Puj saeq naengz mboq yuq ndaw fahtinh saenxpanq piu, naengz mboq hax piu hoak loang gaeng, paenqdix zoq yuq doqnaj daengzle dup piu, aeu piu maz kaeng ndaw lauz, gannaeh daz lupliamx nemz dij goanz yaix piu ni maj? Baenz mboq ndaej oh! Yaix hoakri paenqdix haeggaj daeuj lingz piu og bae!" ³⁸Bin dauh mwz haxdoq puj saeq dwx, puj saeq dwx ruxnyinz paenqdix zawh dij goanz Loahmax, zoq mbu taeuq, ³⁹cenq daeuj ndaw lauz vanz Bauxloah daj Cizlaz laek aeu gaeng naeh nyaengx zaw yaj, yaq zowz paenqdix og ndaw lauz daeuj, vanz paenqdix ni chaenh naeh. ⁴⁰Song goanz dix og ndaw lauz daeuj yaq, zoq mwz ndaw rownz Loixdixyaq, taen bihnongx, byongz paenqdix yaq, zoq ni dih naeh.